

# مشروع الحكايا والتاريخ الشفوي

## ورشة المعارف

٢٠٢٠

الحكايات: حمرة أبو عيد

السلسلة: تجدد

التاريخ: 13/11/2020

رقم الأرشيف: 20-TOH-004

نوع الأرشيف: عام

|                         |   |
|-------------------------|---|
| السلسلة/الموضوع الرئيسي | تجدّد   |
| رقم الأرشيف             | 20-TOH-004  |
| نوع الأرشيف             | عام (لا حاجة لإذن خاص)  |
| الحكاوية                | حمرة أبو عيد  |
| تاريخ ميلاد الحكواتية   | 16/11/1969  |
| تاريخ ومكان المقابلة    | 13/11/2020  |
| ملخص التاريخ الشفوي     | تحكي حمرا عن تاريخ اسلافها من الرّحل، وعن التقاليد والعادات والأنظمة الاجتماعيّة لمجتمع العرب، وعن ترحالهم في أرض لم تحدّها أي حدود، تنقلوا فيها من منطقة الى أخرى، وتصف كيف تأخوا مع الشعوب التي عاشوا بينها. تشارك تفاصيل عن قصائد كتبها النساء الرّحل، وعن الثوب التقليدي والأغاني الشعبية والأعراس والحفلات والبعض من الأطعمة. تروي حمرا قصتها عن كيف وصل جدودها الى منطقة حوش النبي، وعن ذكرياتها في المدرسة، وزواجها التقليدي لأبن عمها الذي تركها بعد فترة. ولحمرا مسيرة شاقّة للحصول على شهادة جامعية مع اولادها تحكي عنها في هذه المقابلة، وعن كتاب "سوالف البادية" الذي شاركت في كتابته.  |
| معلومات عن الباحثة      | ماريانا نقفور باحثة حاصلة على شهادة الدراسات العليا في الأنثروبولوجيا وهي تهتم بالتراث الثقافي غير المادي.  |
| التفريغ                 | زينب الديراني   |
| الكلمات الدلالية        | البقاع، حوش النبي، مركز الآرب للجامعة الأميركية، طرش، رّحل، نجف، السعودية، سنين القحط، القبل، الغنم، البادية السورية، الخليج، العشائر، قانون العشائر، لبناني، سوري، مشايخ، قبيلة، قبيلة الملحم، الخسيني، الفرنسيين، الشيخ طراد الملحم، البدو، حرب، قطاع الطرق، عشيرة، قبيلة طراد، الصحراء، اللغة البدوية، "ذبيحة ومنيحة"، الإنكليز، الثورة الكبرى، شبه الجزيرة، الأمير فيصل، الأتراك، زراعة، سهل البقاع، عيون مي، بيوت شعر، ثورة شمعون، الأظهر، حوش النبي، تل الغسيل، أراضي بور، عشيرة العيدين، حوش تل صافية، دبايح، قعدة البدو، أكلة لذاقية، سمنة أصلية، دواوين، بيت يزيك، حدود، كوشان، هوية، جمرک، هجانة، جمال، مركز جوسيا، وثائق، خضر عبید أبو عيد، بریتال، مرکز فريج، نائب بالبرلمان اللبناني إسمه "نبيل دي فريج"، حوش السناید، اللیطاني، ضیعة الخضر و حرّتال، خیل، سكة الترابین [train]، فلسطین، میجارة، بیت شعر، عبد الناصر، تجنیس، الجولان، سنة ال55، حوش النبي، حوش السیادنة، ترحال، بیروت، أمیرکا، درسة، جامعة، حب، تنمیم، سنة 1969، الحرب الأهلية، العرب، الفلاحین، تمدن، صوبیا، لعبة الإكس، كرون، تمییز، ثانوية ریاق، سامر سلیمان، بدنایل، محمد سلیمان، أدب عربي، زحلة، زواج من ابن العم، بریفیه، اللباس التقليدي للبدو، طفولة، سهل البعر، المركز البریطاني بالأردن، بیدر، عدس، حمص، حمار، مورج، لبننة، كشك، ذبیحة، برغل، منسف، رز، عادات الزواج، عزوات، تسیحات شعر تقليدية، |

عصبة، لفحة، طربوش، حجاب، آلة المزيرة، آلة المجوز، مرتجلة، دبكة، DJ، اللهجة البدوية، الشرع والقضاء لدى البدو، القرآن، تمدن، حلب، حرمة، سيط، مجتمع ذكوري، الشرع الإسلامي، الدكتور رامي زريق، بدنايل، مداواة الأعشاب، سواف البادية، الأمير عبدالله فيصل، كتاب "سواف البادية"، عشبة قريص، قصائد، كورونا

## **Rights of Ownership for the Storytelling and Oral History Project**

The Knowledge Workshop holds full or co-ownership of all items that it archives and publishes. Recordings published on the Knowledge Workshop website can be used only for cultural, educational and non-profit purposes, and never for commercial purposes.

To use the material on our website, including the oral histories and their related images, we ask that you always reference the Knowledge Workshop with: Storyteller's name, interviewed by Researcher's name, Date, The Storytelling and Oral History Project, the Knowledge Workshop, Beirut, Lebanon, page number. [Ex. Nazik Saba Yared, interviewed by Deema Kaedbey, 2017, The Storytelling and Oral History Project, the Knowledge Workshop, Beirut, Lebanon, pp 12.]

To use the limited-use items held within the Knowledge Workshop, you can visit our office in Furn El Chebbak and fill out a permission form. You can use these items inside the Knowledge Workshop space, but we request that you consult with us on which items you can use. Some of these items require permission from the storytellers before being used.

### **حقوق ملكية لمشروع الحكايا والتاريخ الشفوي**

لورشة المعارف ملكية تامة أو مشتركة للمواد التي تؤرشفها وتنشرها. التاريخ الشفوي المنشور على الصفحة الالكترونية لورشة المعارف يمكن استعمالها فقط لأهداف ثقافية وتثقيفية لا تبغى الربح، ولا يمكن استعمالها لأهداف تجارية تبغى الربح.

لاستعمال المواد على صفحتنا الالكترونية، من ضمنها التاريخ الشفوي والصور المرافقة نطلب منكم التنويه بورشة المعارف كمرجع باستعمال: اسم الحكواتية، قابلتها اسم الباحثة، السنة، مشروع الحكايا والتاريخ الشفوي، ورشة المعارف، بيروت، لبنان، الصفحة. [مثلاً: نازك سابا يارد، قابلتها ديمة قاندييه، ٢٠١٧، مشروع الحكايا والتاريخ الشفوي، ورشة المعارف، بيروت، لبنان، ص. ١٢]

لاستعمال المواد المحددة الاستعمال الموجودة في ورشة المعارف (الغير متاحة على صفحتنا)، يمكنكم القدوم الى مكتبنا في فرن الشباك وتعبئة استمارة الطلب. بالإمكان استعمال هذه الموارد داخل ورشة المعارف، لكن نسألكم ان تستشيرونا عن أي مواد يمكن استعمالها. بعض هذه المواد تتطلب طلب من الحكواتيات قبل استعمالها.

مريانا نكفور: اليوم 13 نوفمبر 2020، أنا ب بعلبك عم بعمل مقابلة تاريخ شفوي مع حمرة أبو عيد، ب بيتها. ممم، أول شي بتعرفينا عن حالك، إسمك، أي سنة خلقتي، وين خلقتي؟

**حمرة أبو عيد:** [00:00:19] إسمي، سبق ما ذكرتي، حمرة أبو عيد، خلقت ب ضبيعة صغيرة، بالبقاع، إسمها حوش النبي، هتي قريبة كثير عال-- مركز الأرب للجامعة الأميركية، ب بيت كثير متواضع، كانوا، ممم، كانوا أه--، بيي موظف بالجامعة الأميركية، وعنا غنم، وعنا طرش، ونحن بدو محافظين. يعني كيف محافظين؟، بعدنا كنا عايشين، جينا ع لبنان، ما يعرف إذا فيني إحكي تاريخ كيف جينا ع لبنان، هتي أهلي وجدودي كانوا بدو رحل، ممم، إجوا أولاً، أساسنا من نجف/نجد، من السعدوية. ب سنين القحط، ما كان في س--، السعدوية كانت صحراء، يعني قبل البترول، وقبل ما تصير ال--، تطور الخليج، وهتي إعتمادهن الأساسي كان أكثر شي عالقبل والغنم، ف هاجرنا، إجوا ع صوب البادية السورية، من البادية السورية [صوت صراخ أولاد في الجوار]، في قبل قانون العشائر، مثل الدول هلق، يعني كيف، هي الدولة بتحمي هيدا الفرد اللي هو اللبناني، دولته بتحميه، السوري دولته بتحميه مثلاً، كانوا يلتجؤوا للمشايخ، مجتمعنا كان مشايخ، كل شيخ ع راس قبيلة، قبيلة معينة، في كثير قبائل، ف نحن بيجوا أقليات من نجد، في كانوا قبيلة بعدها لهلق هتي بسوريا بالبادية، هتي قبيلة الملح، هو الحسيني بيقولون، هتي اللي شيخهن كان قديم طراد الملح، وكان وعروف، وكان معروف حتى عند الفرنسيين، الشيخ طراد الملح، كان قوي، كانت عشيرته قوية. قالولهن إنو نحن بتدخلوا تحت عبايتنا، كيف بيقولوا إنو مثلاً بالبدو، نحن منجي بنفوت عالأراضي، منجي ع ضبيعة لبنانية، ممم، ممم، كيف بدتي فسرك، نحن هون ب حمايتكن، بدنا نقعد عندكن، إنو سبرنا سبركن، ف قالوله إنو نحن بدنا نفوت تحت عبايتك، يعني نصير تابعين ل إلك، بشرط إنو تحميننا، تحميننا من القبائل الثانية. كيف بتصير حروب بين الدول؟ القبائل كانت نفس الشئ، يصير مثلاً حرب، الأقوى هتي بتسيطر عالضعيف، والشيخ الأقوى هو اللي بيحمي عشيرته، والأقوى هتي بتلتف حواليه العالم أكثر، بيحمون، مثلاً، إذا، كيف كانوا يحموا؟، أنا كنت إسئل جدتي، إنو كيف يعني يحمون؟، بقلتي "مثلاً، حدا تصادر عنده شي، هو إلو كلمة بالدولة، بيحمينا. حدا تعرّضنا، مثلاً، قطع طرق بالصّحراء كثير، مثلاً، بيجوا ببشأحوا"، أو بس يعرفوا إنو نحن من قبيلة طراد، يعني المعلم ملح، ما حدا ببسترجي يقرب علينا، أو يدق فينا، بالعربي اللبناني يعني. ف إلتجأوا ل هي قبيلة الشيخ طراد الملح، والشيخ كان عندهن قوانين إنو اللي بيفرض، ممم، بيفرض ع كل فرد من القبيلة، بيقولوا "ذبيحة ومنيحة"، باللغة البدوية، هيدي كيف بياخذ الدولة ضرائب، نفس الشئ، كيف الدولة بتاخذ ضريبة لتأذملك، بتاخذ ميكانيك، لتقدمك، إنو، تعملك طريق منيح، مثلاً هو بياخذ، بيقولوا "ذبيحة ومنيحة"، الذبيحة يعني بيدفع راس غنم، اللي بيخلف، هاي "منيحة" بيقولونها، والذبيحة، يعني بكون خروف خرج الذبح، لأنو الشيخ بيجي لعنده ضيوف، إذا صار عندك مشكل، بدها تجي الناس ع بيت الشيخ، يعني، هو اللي عم يتخ--، ي--، هو اللي عم يتخسر، هو عم يتكلف، مقابل إنو هيدي الش--الش--الرمز البسيط، إنو الغنمة، بيكثروا غنماته، بتصير تخلف، بيصير فيه يستقبل عالم، بيصير بيضل كبير بعين العشائر الثانية، ف بيفرضوا عليهم، وإذا تعرّضوا لأي، مثلاً، تعدّي من قبيلة ثانية، كمان الرجال بدها توقف تحامي عنهن، مثل ما هتي أهل القبيلة الأساسيين بيجاموا عنهن. ف إلتجأوا للشيخ طراد الملح، وصاروا تحت عبايته هتي. بعد منه إجي، ممم، توفى طراد، الفرنسيين قالوا بحقه إنه طراد قد مية مية رجل، مقابل مية رجل، لأنو هو حارب الفرنسيين، وحارب مع الإنكليز، وكانوا يحاربوا بالثورة الكبرى هتي البدو [00:05:19]، كان كثير إلهن أكبر دور بالثورة العربية الكبرى، اللي هتي صارت ب شبه الجزيرة، بقيادة الملك-- الأمير فيصل، كان إلهن دور كثير كبير. وع دور الأتراك كمان، ممم، اللي بعدين هتي، بدتي إجيكي بعدين ب كيف ما تجنّسنا، لأنو صار عندهن، صاروا ياخذوا الأتراك عسكر، ممم، صاروا يهربوا من الجنسية، إنو بيضلوا ولادهن مش معروفين، قديش عندهن ولاد حسب التسجيل الرسمي، ف تهرّبو إنو يتجنّسوا، مع إنو إجاهن تجنيس ب لبنان بعدين، بعد ثورة شمعون، إجي تجنيس عام، رفضوا يتجنّسوا، صاروا يخبّوا الشباب، كانوا بعدن ب بيوت شعر، م--ما، ما عمروا، يخبّون، يقولولهن "نحن ما عنا شباب، وما بدنا نتجنّس"، عأساس البدو تفكيره إنو الدني كلها إلو، وين ما بده، دغري، بيت هالشعر، دغري بيهبطه، بيحطه ع جمال، وبيقل، بكون هون مش عاجبه، بيروح ع محل ثاني. ف ثاروا/صاروا وقت اللي ب سوريا، بصير في سنين ما بتشتي الدني، بيصير في سنين محل بيقولولها، يتمحل الدني، صاروا يتجهوا صوب لبنان. هلق لبنان فيه خضار أكثر، وفيه مراعي، وفيه زراعة أكثر، و، وفي مي. وقت اللي بسوريا، شبه [غير واضح: الجزيرة] صارت ما فيها مي كثير، مش شبه الجزيرة، عفواً، البادية السورية، بس ما تشتي الدني، ما بعود فيها مي، بصير بدهن يتجهوا ع محلات فيها مي، فيها خضار، ف صاروا يجوا ع لبنان. كيف يجوا؟ وين مراكزهن أكثر شي البدو؟ كانوا يقعدوا حد الأنهر أو العيون، كان في بسهل البقاع كثير عيون مي، يعني عين بتحسيها كأنها مثل النهر، بتمرق، بتضل صيفاً شتاءً، صاروا أكثر شي يقعدوا حد، مثلاً نحن هون، الأبو عيد اللي ب حوش النبي في عين بيقولولها عين تل الغسيل، هي تلة حد الجامعة الأميركية، عالحدود دغري، هي نبع ت-- عين الغسيل، ع بتمشي مثل النهر، كل الصيفية، بيجوا، كانت مرجة، ما كان في عمار مثل هلق، كان في كثير أراضي بور، يعني. ف بيخيموا، بينصبوا بيوتهن، أنا ما بحب قول "خيمة" لأنو نحن منعبر إنو بيوت الشعر كثير مهمة، الخيمة إنو شي بسيط، بس إنو نحن

منعزب بيوت الشعر لهلق، بيت كثير حلو، وهو بيتنا يعني، بينوا بيوت الشعر حد مجاري الأنهر، مثلاً في ناس، ممم، قاعدين هو، العيدين، مرة رحنا لعدهن، في عشيرة ثانية إسمها العيدين، قاعدين بحوش تل صفية، حد نبع ع--، كمان في نبع مي، اللي هني رجعوا عمروا هونيك، في ناس قاعدين لنفترض ب بتربل، صوب التربل، كمان حد نهر مي، بتحسي إذا بت--، بتدرسي، بتلاقي أكثر شي تجمعتهن حد، حد، يا نهر، أو نبع مي، مشان ع يد يسقوا الغنم، ويكون في خضار، يكون، وبعدين بس إستقروا، ما هلق بيحي، قعدنا حد نبع تل عين الغسيل، مثلاً، نبع تل عين الغسيل، بيتعرفوا ع ولاد المنطقة، بصير عندهن صحبة هني وياهن، أني جدي--، ستي كانت تخبرني إنو بس تجي ل نرحل، أو للشتي، بيصيروا بيكوا اللبانية اللي هون، بيقدونا، إنو "وأيمت اللي ترجعوا؟ ح نفقدك"، وح--، وقت الكانوا بجوا البدو، بتلاقي كأنه عيد عند اللبانية، لأنو يمسبوا البدو قعدتهن حلوة، وع قهوة مرة، وع دبايح، وع بيعملوا لذاقية، أكلة هي، حلو، كثير طيبة، عند البدو، بيعملوا سمنا أصلية، وهالعالم، بتعرفي قبل، ما كان في شغل مثل هلق، والعرب بيتهن بتضل مفتحة، للدواوين ولل--، عرفتي؟، ف كانوا يحبوا كثير البدو بس بجوا. كل ناس، محل ما قعدوا، تصاحبوا الناس، رجعوا عمروا بنفس المحل، يعني، حسب الناس اللي تعرفوا عليهم، مثلاً نحن هون، نحن، عمومتي، وأهل جوزي، وهيك، تعرفوا هون، في بيت يزبك، هني يقولهن "تعوا، خذوا أرض"، يعني هني يشروهن، يعني، برغبة، ب هيك، "إشتروا أرض وعمروا حدنا"، وشروهن أرض، وعمروا، ونفس الثالي صار مع كل ناس، كمان إشتروا محل ما هني أول شي إجوا، صاروا بينوا بيوتهن، [تأخذ نفس]، ف، جينا، عمرنا، وإجت إستقرت، لكفيلك إنو كيف إستقروا ب لبنان، بجوا بأول الربيع، أول تشارين [00:10:19] بيلشوا يفلوا، بيلشوا يفلوا لأنو ب البادية، بالشتوية، أدفي المناخ، وما في وحل، هون بتوخل الدني، وهيدا الطرش ما بيسواله الوحل، الغنم، وبيحي تلج، وقساوة، بدهن يطعموا كل شتوية، هونيك أدفي، وأنصف للطرش، وأدفي، وبيطلع بالبادية، بتربع قبل هون الدني، بيصير ربيع، لأنو أدفي هونيك، بيطعموا فترة الغنم، بتصير تسرح، يعني بيطلع في أعشاب بالبادية، بتسرح الغنمة، بيصيروا يوقروا عليهم طعم.

م.ن.: البادية بسوريا؟

ح.أ.ع.: [00:11:00] إيه، بادية الشام. وكانوا يقطعوا عالحدود بدون شي، ما كان في حدود بين لبنان وسوري، يعني كان الشغلة الوحيدة، يقطعوا، لا في-- بيسألوهن لا هويات، أصلاً إذ ما معهن هويات، ما معهن شي، يعني هني، كانوا يطلبوا منهن يعدوا الغنم بس، يعدوا رؤوس الطرش، مثلاً، بعدوا، إنت كون معك راس غنم، يفوتوا ع سوريا، بالر-- بيطلع عداد لعدهن عالبادية، بيرجع ب عد الطرش هونيك، بالبادية، كل واحد قديش، وبيختموهن، بيقولوه "كوشان"، بيستعملوه هيدا الكوشان، الكوشان وين بيسلموه؟، بيسلموه ع الحدود، إنو نحن هالقد معنا، ليه، لحتى ما يخلوا متري وقت السياسة السورية، إنو يمكن مشان ما بيبيعوا غنم هونيك، إنو يصيروا عم بيأثروا عالناس اللي موجودة، يمكن هيك تفسيرها، إنو ليش كانوا حريصين إنو يعدوا بس طرش هني، يقطعوا، بجوا، بعدين تغير، صار عالحدود يعذبوهن، يعني اللي بده يمرق عالحدود، بدهن هوية، بدهن ممم، بدهن جمرك، في ناس ضللت تقطع تهريب، هلق شي يزمط، شي نلقطهن اهجانة بيقولهن، هو الحدود، بيقولهن "الهجانة"، ما بعرف إذا سمعناين فيها نور، كلمة الهجانة، هني جاية، هني جمارك، بس لأنو بيركبوا ع جمال، بيقولوها الهجن، من هيك، من هيك إجت الكلمة، بعدهن ل هلق بالدول العربية بيستعملوها الهجانة

م.ن.: الهجن يعني جمل؟

ح.أ.ع.: [00:12:48] الهجن، الجمل، مش كل الجمال بيقولوها الهجن، يكون الجمل اللي بعده فتى، قوي، لأنو إذا بدهن يطاردا شي حدا، بعدوا مش--، شوفي كيف ال، البيئة وال[تسئ]، والقطرة عند البدو، ب، هيدا الهجن، [صوت بالخلفية: أحدهن تنادي: سما]، الجمل الهجن، يكون بعده مش م--، مش، بدي قول [تضحك]، كيف فسرها علمياً، ما هني، بعده مش معشّر ولا ناقة، يعني، بعده هو بيعتبروه إنو خيره فيه، كيف الشب بعده مش نايم مع مرا مثلاً، بعده بيقولوك "شب قوي"، مش--، بعده، بقول نحن بالبدو "خيره فيه"، [ينقطع التسجيل ثم يكمل]، ف هيدا الجمل الهجن يكون بعده كثير قوي، ف هي من هي إجت الجمارك الهجانة، هي اللي بتكون قاطعة عالحدود بالصحراء، البعيد عن المناطق الرئيسية، مثلاً مركز جوسيا لنفترض، هيدا مركز معروف، مدني، الهجن يكونوا منتشرين ع الحدود، بال--، بشي بعيد عن الطرقات، يعني، بيقولهن الهجن، ف كانوا يزمطوا، مرات إذا نلقطوا، بدهن يعملوا [؟؟؟هويات؟؟؟]، بروحوا تهريب، صاروا، المهم، كثير يتعذبوا، صاروا كثير يتعذبوا [صوت زمر بالخلفية]

م.ن.: أيمتي صار في هالاشيا؟ ع وقت ستك وجدك تغيروا، بطلوا يقدروا يمرقوا ب سهولة؟

ح.أ.ع.: [00:14:14] كان هيدا الحكي ع دور جدوي، ستي وجدي، حتى كان بيبي شر--، أمني كانت تشرق وتعرب، نحن منقول "بيشروا وبغزبوا"، إنو غرب [هو] لبنان، شرق [هي] البادية السورية، ف، ص--، وهون، يقولهن هو اللبانية اللي

تعرفوا، "خليكن، وبلا ما تروحوا"، وحتى لو، إنو الحياة ب لبنان أريج، يعني طبيعتها أريج، و، و، ف--، وهونيك ما عندهن إنتب--، ما عندهن تذاكر ل تربطهن بالدولة السورية مثلاً، مش موثقين بالدولة، ما عندهن وثائق، بعديهن بلا شي، ف قرروا يضلوا ب لبنان، قعدوا ب لبنان، فترة ي--، يعني ص--، ضلوا ع بيوت الشعر، شوي شوي، أول حدا عمر هو جدي، إسمه خضر عبيد أبو عيد، ميم، ليش عمر أول شي؟ بس إجوا إستقروا هون، ما عندهن أرض، ما عندهن أراضي، و ما عندهن، أهم شي هو الأرض، صاروا يتشاركوا مع اللبنانية، مثلاً ناس شاركت أهل بريتا، مثلاً أهل بريتا، كمان كان قبل، حتى المجتمع اللبنانية كان عندهن، إعتمادهن كثير عالطرش، يعني، هني عندهن طرش، البدو، واللبنانية بيقولولهن "نحن منقداً أرض"، بيتشاركو هني وياهن، بقدمولكن أرض ومحل، بينوا بيوت، وبيتشاركو هني واللبنانيين، جدي تشارك هو والمركيز نب--، مركيز فريج، بعده لهلق، إبنه نائب هلق، طلع نائب قبل، مدري بكم دورة، ميم، نائب بالبرلمان اللبناني إسمه "نبيل دي فريج"، ن--، هيدا فريج عنده قصر ب حوش السنايد وعنده أراضي كثير واسعة، بتمتد من الليطاني غرباً، شرقاً ل حدود ضيعة الخضر و حرتال، ف شاركة جدي عالغنم، وكان عندهن خيل، وكان عندهن جمال، هلق، قعد هونيك، وبلش، إشتري أرض، يعني بالأ--بالأه--، قعدوا عند فريج فترة، بعد هالفتره، كمان إشتروا أرض من الحج حسن وعمر جدي أول شي، وإستقر أول شي جدي [صوت أذان في الخلفية]، صارت العرب اللي بتسرق، صار بيت جدي ع سكة التراين [train]، هني سكة التراين [train] تاريخ في، مثلاً، للعلامة، بدك تقولي مش علامة، مثلاً، كسف بيقولوا هلق مثلاً، منزل عال-- عالصيد، بنزل عال-- شو إسمها، وين في محلات ب بيروت، مثلاً هون ب بعلبك بيقولوا العجيلة، عودريز مثل عنوان، يعني. هني سكة الحديد كانوا ال-- البدو بس بدهن يرحلوا، بيمشوا ع سكة الحديد، أكثر شي بيعتمدوا طريق سكة الحديد، ليش؟ لأنوا طريق سكة الحديد معروف، ولأنو سهر، يعني، ما فيهن يمشوا عالطرق العامه، الزفت، بيتبعوا طريق سكة الحديد، هي اللي بتوصل لبنان بسوريل بفلسطين، خزبوها بالحرب، ضيعانها، بتوصل لتركيا هني سكة الحديد، ف بيعتمدوا سكة الحديد، بيت جدي قريب ع سكة الحديد، صاروا العرب اللي ضلوا يروحوا، ب--، بينزلوا، هني كل مسافة معينة، بذهن ينزلوا حتى يرتاحوا شوي، يطعموا الطرش، ياخذوا إستراحة، ينزلوا ع بيت جدي بيخلوا أغراض عندهن، مثلاً ما فيهن ياخذوا كل غراضهن معهن، ياخذوا شي بس يقديهن يعني، كيف بدك تسافري بتاخذي شنطة ثياب، هيك، أي غراض منهن عايزينها، يتركوها عند بيت جدي، ويكموا، بس يرجعوا، أنا من بيوت أهلي كانوا يحطوا عنهن غراض، كان عنا ميم، هيدا الصالون، نحن قبل، بتقولوله إنتوا صالون، كانوا أهلي مش فارشينه، كان يتعبي غراض للبدو اللي بدهن يروحوا، بس يجي أول الربيع يمرقوا ياخذوهن يستعملوهن. بلشوا يستقروا شوي شوي، ناس، هيدا فلان عمر، بتعرفي، وهدا فلان عمر، وهدا، بهي الفترة، وقت اللي إستقر جدي عند ديفريج، تشارك هو وإياه عالغنم، وقعد عنده، وقعدوا، ما عاش راحوا، بلشوا بينوا الجامعة الأميركية هيدي الأرك اللي هون، فرع للجامعة الأميركية، ف بيقولولهن بالجامعة، ميم، جابوا غنم، ما هني بيعملوا دراسات ع كل شي بالجامعة، جابوا غنم ل--ح-- ل [حرس/خرج] الدراسات يعني، أ--قل--أ--قالوا هونيك، ما يعرف كان مين المدير، قلّه ل ناس من عنا إنو--، بيعرف حدا أو شي، أو بيعرف حدا، إيه، وكيل عند ديفريج، ما كانوا عندهن وكلاء، كل واحد عنده أرض وهيك، بيحط وكيل عالأراضي، عالف--، عالي بيزرعوا، عال--، بقوم ب-- ع--، هيدا مدير الجامعة عم بيقله للوكيل عند ديفريج إنو "بدي حدا يسرح ب الغنمات، بدك تدبرلي حدا يسرح بالغنمات"، قام قلّه "إيه، بشوفلك" جاية هو وياه بالصدفة، بيي سارح بالغنم، عم بيدق عالميجارة وهالغنم سارحة، قلّه "هدا الشب لو يروح يشتغل عنا، يسرح بالغنمات اللي للجامعة"، قلّه "إيه، بقول لأهله"، إجي، قال كان على وقتها بيي بيقلّي "كان عمري شي 15 سنة"، أخذوه، وقد ما هني يهو--، بيي كثير آدمي، دغري وظفوه، مع إنه ما عنده هوية، ما عنده شي، يعني دغري توظف، هيدا بيي توظف قبل ما يعمرّوا، كانوا بعدهن ب بيوت شعر، خلقوا إخواني الإثنين التوم ب بيت شعر، في محطة حد قصر نبيل ديفريج، محطة للتراين، كانوا أهلي نازلين حد المحطة، كان بعد القطار يروح ويجي، هالمحطة هي ع دور تركيا، يمكن هني تركيا أو فرنسا اللي عملت سكة التراين؟، ما يعرف، المهم كانوا قاعدين، بيوتهن حد المحطة التراين، وقت اللي خلقوا إخواني التوم الكبار، بس--، هني كانت على حر-- مانث بال55، يعني نحن بدك تقولي هيدا الحكّي كلّه اللي حكيناه، قبل ال55، هيدا تاريخ مهم، لأن حافظه تاريخ ميلاد إخواني، كانوا بالجامعة يدونولهن، كان هون ما حدا، ما بتعرفي إلا وقت قليل، بس تطلعنا الجنسيات، ليعرفوا هيدا خل--، أيمنين خلقان، ناس بتقلق "أنا إبنّي خلقان وقت اللي توفّي عبد الناصر"، ناس بتقلق "أني بنتي خلقانة وقت الحرب، وقت اللي فاتت سوريا عالجولان"، مثلاً هيك تواربخهن كانت

م.ن.: وقت الحصدا القمح [تضحك]

ح.أ.ع.: [00:21:07] أو وقت ال--لأ، وقت اللي إنذبح فلان، وقت اللي حصدا القمح لأنو كل سنة، ما ب توراخوا هيك، مثلاً وقت اللي إنقتل الشيخ فلان، مثلاً وقت اللي ينقتل شيخ يعني حدث مهم عندهن، بقولواك وقت اللي إنقتل، مات، وقت الحرب نعيم والحسنى مثلاً، إنو عشيرتين تقاتلوا ب بعضهن، إبنّي خلقان بهيديك الفترة، هيك كانوا يتوراخوا، بالجامعة صاروا يكتبولهن وثائق ولادة ل إخواني، كل ما بيخلق ولد، يكتبولهن، لذلك هيدا التاريخ--، هيدا كله الحكّي اللي حكيناه، هيدا كله قبل



ال55، من ال55، وهيك، بلشوا يفكرؤا، جدي بعد ال55، كانوا إخوانتي صغار، وعمّر، فترة بدك تقولي، فترة 10 سنين، 15 سنة، ضلت في ناس، بلشوا مش كلهن هوب-طف دغري عمروا، يعني ناس بلشت، ناس اللي عنده أحلى اللقب، إنو أرض، اللي حدا مثلاً هيك، بلشوا عمّروا شوي شوي، كل ناس حسب ما إستقرت، [تصفق بيديها مرة] نحن إستقرينا ب حوش النبي، إستقرينا ب حوش النبي، جدي عنده، هني أخّين، جدي وأخ ثاني، خيول جدي أ--، هون، كانوا يقعدوا حد نبع تل عين الغسيل، بالأساس، تعرّف ع ناس من بيت يزيك، إشتري أرض هون، عمّر خيه، يعني خيه ل جدي عمّر هون، وجدي عمّر ب حوش النبي، حدّ، بحوش السيادة، محاضبة، حوش النبي، حوش السيادة، ممم، لأنو--، إشتري بحوش النبي لأنو الماركيز دي فريج ما يبيع أرض، إشتري عالحدود، يعني في الطريق، نحن محل ما معمرين أهلي هلق، وبيت جدي، في الطريق بين حوش السيادة وحوش النبي، هني إشتروا أرض ب حوش النبي، عمّروا، إستقرؤا، ضلؤا يشتغلوا عند ماركيز فريج، تشاركوا عليه عال--، عالخيل، كان جدي، بيت جدي عندهن خيل، تشاركوا معه عالغنم، الجمال، الجمال كانوا أكثر شي يستعملوها ل الترحال، ل يحملوا عليها، بلّشت شوي شوي، يبيعوها، لأنو صاروا يستغنوا عنها، يعني بيعسوا إنو فايدتها قلت، عرفتي؟، ف فترة معش عندهن جمال، باعوها، عرفتي؟، ضلوا إعتمادهن ع الغنم، والمعزي، والطرش، ف، ممم، بعد هيدا ال--ال--ال-0 بلشنا بح--، صرنا نقرب، نحن، بيتنا، ب شغل بيبي بالجامعة، صرنا أكثر ننشد للمدينة، للحياة ال--، لأنو بيبي عالجامعة أمركان، بيبي أجانب، بيبي من بيروت ناس، بشوف بيبي إنو في بنات عم تجي تتعلم، عم تترك أهلها، يقعدوا، بيتعلموا، بيروحوا، بيجوا، صار عنده كثير--، بيحلم "أنا بدّي علم أولادي، يصيروا مثل هو، بدّي علمهن"، بدو، ممم، كان يضلّ ع طول يقنا "تعلّموا، وبعلمكن بالجامعة، ويمكن يسفروكن بعدين إذا طلعتوا شاطرين، بتروحو ع أميركا"، مرة سألتها، قلتها "بتخليني روح، سافر؟"، "قلي "إيه يا بيبي، ليش ما بخليكي؟ ما أنا عم يجوا بنات عالجامعة، بشوفهن، عم يتعلموا، ما بيعملوا شي غلط، ما شفنتش"، بالوقت اللي كانوا عنا البدو كثير إنو "أل شو تبعت بنتك عالمدسة؟ لك روح، جبلها شي 20 راس غنم أو معزي، وخليها تسرح فيهن، بتفيدك، غير بدها تصير بكرا تبعت مكاتب للعريس، إذا علمتها"، بيبي ما يردّ عليهن، أني مرة، أني سمعانتها إنو "ليش عم تعلم بناتك؟"، إنو، منروح عالمدسة، يقلن "يا عمي خيلهن، بيعت، ما هي عالجتهن بدّها تشوفه للعريس، إذا ب مكتوب ولأ ب غير مكتوب"، يعني ما في حبّ عند ال--، ما في غرام عند البدو، بس إنو بيشفوا بعضهن، بس مش عن طريق المكتوب يعني [تضحك]، قبل كانوا الفلاحين بيعتوا-- المعلمين بيعتوا مكاتب، ف بلّش حبه إنو يعلمنا، إيه، بيعت إخوانتي، يوصلوا ل فترة، ما ال-- المجتمع بيعلب، الإنسان إبن بيته يعين بيوصلوا فترة إخوانتي، وبتروكو، يتركوا المدرسة، يتعلموا فترة وبتروكو المدرسة، مع إنه كان حاططنا بأحلى مدارس، كان في مدرسة رسمية بالضبعة، هو كان بيعتنا ع، بتنميم في مدرسة خاصة، ما بيعرف بيبي، سأل واحد رفيقه، قلّه "إنت وبين حاطت ولادك بالمدرسة؟"، قلّه "حاطتهن بتنميم في مدرسة خاصة وكثير مهمة"، قدّيه كان في مدارس خاصة، مثلاً قول الجواد، المبرات، هيك، المدرسة هيك وقتها، قلّه "إيه سجّلي ولادي معك، وبيروحو مع ولادك وبيجوا"، صار بيعتنا ع مدرسة، بيعت إخوانتي قبل، أنا هالمدرسة قعدت فيها شي سنتين بس [00:26:07]، رجعت قعدت ب مدرسة الضبعة، لأنو صار في حر--، كان وقتها حرب أهلية، بلّشت الحرب الأهلية، أنا مواليدي ب 16-11-1969، عرفتي؟، يعني كان عمري--، دخلت روضة، أول سنة، ثاني، تقريباً بال75، بلّشت الحرب، يعني أنجأ كنت أني روضات، عرفتي؟، يعني بدك تحسبي من ال70، أخذت أني بس 16، يعني أخذت نص شهر من 69، إيه، ف بلّشت الحرب الأهلية، صارت الأوتوكارات [autocars] معش تجي وتروح، فالإخوان اللي كانوا طلغوا من المدرسة، طلغوا، بقيت أنا وأختي الأكبر مني شوي، وأختي إثنين صغار، أصغر مني، قعدنا ب مدرسة الضبعة، مدرسة كثير بدائية، كانوا--، ما كان في مبنى مدرسة، كانوا من الأجار، بيستأجروا 4-5 أوض، حدا عنده معمر، وتجي أساتذة من الضبعة، يعلمونا، نروح، بس نحس إنو نحن ع طول، اللبانية [يحبسوننا]، إنو نحن ما بح-- ما ن-- ما بيعترونا مثلهن، بيضلوا عندهن إنو نحن--، خاصة أول ما جينا عالمدسة يعني، إنو منضّل نحن مع بعضنا، أني وإخوانتي التنتين، وولاد عمي تنتين، كنا هو بالمدرسة، مش كل العرب، نحن، من العرب كلها، هو، اللي ب حوش النبي طبعاً، كنا نحن هو، يعني أني وإخوانتي تنتين، وولاد عمي صبي وبنات، نضّل هيك لحالنا، شوي شوي ممم، صرنا نفرض--، طلغنا، كنا شاطرين بالص--، بالصوف، يعني، المهذبين، يمكن لأنو مش أخذين وجّ ع رفاتنا، ما نحزّ [تضحك]، يعني، ما ناخذ، ما فينا نحزّ ونعمل اللي بدنا ياه مثلهن هني، ف صاروا المعلمين [يحكوا عنا] إنو "شاطرين، مهذبين، نضاف"، كانت أختي كثير كثير تهتم ب نظافتنا، تقلنا "ما بدّي شوف واحد جاية شي دبغة ع مريوله، بيصيروا الفلاحين بيقولوا عنا وسخين، هو العرب وسخين"، يعني كل يوم الصبح، المريول بدو يكون كثير مكوي، كثير الأحذية، أجلك، كثير نضيفة، وكلساتنا كثير نضاف، وشعراتنا كثير مرتبين، ولايسين أحلى لبس، تهتم ب هيدا المظهر، بس لحتى--، نحن إجمالاً، ليكي، العرب نضاف، العرب، في بيوت، أنا ما بعتر إنو التمدن، إنو المدني أكثر هو أنضف، في بيوت بالعرب ما في أنضف منهن، حتى ب بيوت الشعر، أنا ما، مش واعية بيوت الشعر، بس إمي بتخبرني إنو هني كثير نضاف، ل درجة، بس كانوا يرحلوا، بس بدهن يرحلوا ويفلّوا ع سوريا، ما هلق البيوت--، ما يبتتروا نفايات وراهن، النفايات اللي كانت تطلع عندهن، ما بعرف، وما كان في نفايات قد هلق، بس ينظفوا، يكنسوا أرض البيوت، شو في مثلاً، شفقة، قطعة نايلو [nylon]، سويد غنم، كلّه يجمعوه بمحل، واللي بينحرق بيحرقوه، بيرجعوا يطمّوه ب تراب، لحتى



بيس--، بكرأ بيقولوا "فلوا العرب، وليكوا، تركوا الوسخ وراهن، مجويين العرب"، عرفتي؟، ف ينظفوا كأنو ما--، يضل بس الحجار، لأنو كانوا يثبتوا البيوت من تحت الشعر، عطف البيت، يثبتوه ب حجار، أحلى ما يطير من الهوى، يظلوا بس الحجار، ميين إنو هون أرض بيت، ف كانت أختي تهتم كثير ب نظافتنا، أح--، بيصيروا يقولوا عنكن إنو إنتوا، بيفكرنا إنو نحن العرب وسخين، ف يقولوا الأساتذة "كثير نضاف، ولاد العرب"، يقولونا "ولاد العرب"، أو "تلاميذ العرب"، [00:30:07] "كثير نضاف، وكثير مهذبين، وكثير شاطرين"، صاروا يحبونا، وأكثر شي أني، نفسي من طفولتي بتذكرها، أني كثير رقيقة، حساسة كثير، عرفتي؟، يعني، حتى ب بيت أهلي، ما بحب حدا يوجّهلي كلام، عرفتي؟، كان إذا مرة مثلاً، أنا بذكر، مرة إختلفت أني وأختي، ع يد بونبونتين [bonbon] وحدة حمرة، وحدة خضراء، أني بدني الحمرة، وأختي بدنها الحمرة، هبي أكبر مني، عطت--، عطت-- [تضحك] أخذت غضباً عني الحمرة، أخذتها، ضلّيت إبكي ل يجي بيبي من الشغل، ضلّ إبكي، ل يجي بيبي الساعة 4، كان يجي من الجامعة، ل حتى يراضيني، ما أنا، ل يصيرلي، إنو أنا [تضحك]، إنو "إيه، معلية شي، وهلق بدني أضربها، وهلق بدني إذبها، وكيف بتأخدي--"، يعيط ع أختي، إنو أنا ما بقبل حدا يتعدى، أني شغلة--، بس [؟؟؟ غير واضح؟؟؟] الشغلة اللي بدني ياها، حابتها، بدني ياها، بحب أحصل عليها، وياما كون ز علانة من أمي أو من حدا من إخواني، روح بيبي، يجي، يروح يتصيدلي، ويجي عشية، بتذكر "هو العصافير كلهن ل حمرة، ما حدا--"، كان بيبي عنده هوية بالصيد، بس يجي من الشغل، بيحمل البارودة، يروح يتصيد، بجبلنا عشية الصيد، العصافير، بيحظن عالصوبيا، مثل هالأيام، هو موسم الصيد، لصيد--، مش كل الأيام في صيد، بالربيع، وبأول الشنتي موسم الصيد، منكون مشعلين الصوبيا، "ما حدا بيقرب عالصافير، هو كلهن ل حمرة، مز علينا وميكينها"، ومدري شو، ف كان بيبي ع طول بيحشلي، وبالصف ما بحب حدا يوجّهلي شي، ع يد هيك إعتدت أدرس كل شي، إذا شغلة مش فهمانتها، أو مش--، بقعد بصير إبكي، بنتي هلق هيك، طالعة مثلي، إذا شغلة ما فهمتها بالمدرسة، بتصير تبكي، فصرت أطلع من الأوائل، وقت اللي صرت أطلع من الأوائل، مم، صاروا هنّي رفقاتنا اللبنانية يتقربوا مني أكثر ويصاحبوني، اللي ما بده يرافقتي صار يرافقتي ويحبنى ويتعاطى معي، إنخرطنا أكثر، وبتذكر شغلة، هي بعدها بتحرّ عندي، مرة رايحين بالمدرسة، منوقف نحن ع جنب [في الملعب]، رفقاتنا بيلعبوا بال إكس [حبل مغيط يوضع حول قديمي شخصان يقفان بمقابل بعضهما، ويحاول شخص ثالث أن يقفز فوق الحبلين بسلسلة معينة من القفزات، وإن أخفق، يخسر]، منروح قبل ما يفتحوا الصفوف، نحن منوقف ع جنب، ما حدا بيلعبنا، وهني--، نحن ما فينا نعمل إكس، يعني نجني نحن ولاد العرب، إنو بدنا نعمل إكس ونلعب لوحدا، ما بيخولنا، هيك واقفين ع جنب، إجت بنت--، بعدين صارت رفيقي، وبعدها هلق صديقتي، بس، ناطرة أوتوكار، بدهن يروحا، بيجوا ع مدرسة بعيدة عن الضيعة، شي نحن قاعدين هيك، صافين حد بعضنا بالشمسات، وهبي عم بتقول "ليكوا ولاد العرب شو نضاف، أنصف من ولاد الفلاحين، ليكوا شو نضاف ومرتبين، ومهذبين، وأنصف من--، بيضلوا يقولوا ولاد العرب، ولاد العرب، ليكوا شو نضاف ومرتبين"، هبي أكبر مني، واعية يعني، عم تحكي ل يلي حوالها، مش ل إنا، قام أني--، بعدني لهلق هالسافلة ما بنسأها، بتذكرها، وسال--، وشغلة ثانية ما بنسأها، كان في شب، هو مات الله يرحمه، كانوا يقطعولنا الطريق بالضيعة، ممم، يادونا بالكلام، مرات يجي ح--، يقدّموا بدهن يضربونا، نحن نخاف، حتى نخاف نقول ل أهلنا، هلق أهلنا، بيصرفوا أهلنا، أكيد لو قائلينهن، إنو بيجوا ينبهوا عليهن، بس نحن ما نقول لأهلي، وهني أخدين، هنّي بينظروا كمان أوتوكار، برات الضيعة، نحن منساقب طريقنا من حدن، نحن منمرق قبل ما يفلوا هنّي، كل يوم، مثل كأنو قاطعينا الطريق، أو بدهن يتعدوا، هيك، يضربونا، أو يسمعوننا كلام، "إنتوا ولاد العرب إنتوا--"، هيك بصير يتمسخروا علينا، هالشغلة عملتلي عقدة، بعدني لهلق ما بنسأها، عرفتي؟، إقترحنا، عملنا أني وولاد عمي وإخواني، إنو نروح من طريق ثانية، بس بتصير بعيدة، شفتي الطريق اللي من بين الكروم، هلق يفوت من عنده، من الAUB [الجامعة الأميركية] لعند أهلي، هي كانت تراب، المدرسة براس الضيعة، فوق، تحت الAUB شوي، ف، قتلهن "تعالوا نصير نروح من هي الطريق، نبعد عنهن"، ف إيام يكون وحل، ونحن كيف بدنا نمشي بالوحل؟، المهم، آخر شي، معش في إنا مجال، قلنا ل أهلنا إنو عم يقطعولنا الطريق، راحت أمي إيام صارت توصلنا، أو مرت عمي، تروح توصلنا، ورجعوا قالوا ل أهلنا [00:35:07]، ما بعرف كيف وقتها نحلّت المشكلة، نسبت كيف حلّو أهلي المشكلة [ينقطع التسجيل ويبدأ من جديد]، المهم، تابعت دراستي بهي المدرسة، حبوني كل الأساتذة، يفضلونني ع كل التلاميذ، كنت أطلع الأولى بالمدرسة كلها، ع كل الصفوف، عطل، أنا جيب أعلى مجموع بالمدرسة كلها، بقيت--، وصار يجوا، مثلاً، ال--تل--حجا يشوفه ل بيبي، صار أهل الضيعة كمان يحيوني، كل، مثلاً كل من بيسال إبنه "مين طلع الأول؟" [يرد عليه] "حمرة"، بالضيعة إنتشر إسم حمرة، صار كأنه معروف، "مين طلع الأول؟" [الجواب دائماً] "حمرة"، يصيروا يعيطوا ع ولادهن، إنو "اليش هالبدوية بتغليكن وبتطلع الأولى؟"، ومدري شو، المهم، أهل الضيعة يجوا يشوفوا بيبي "بنتك شاطرة" وبتنك هيك، صار في مثل كأنو تشجيع، يعني صار الجو العام كله إنو "حمرة شاطرة"، حتى ناس بقولولي "إنت حمرة؟" عالطريق، إنو "بيقولولي ولادي إنو إنت كثير شاطرة بالمدرسة، وبتطلي الأولى"، هنّي أهل الضيعة بيقولولي، ف تابعت دراستي لل--، للبريفيه، بمجسة الضيعة، مدرسة حوش النبي الرسمية، رجعنا جينا للسنتوي، رفقاتي وين بدهن يتسجلوا؟، اللي طلّعوا معي بالصف--، طبعاً تغيّر الوضع بس وعيت، صار عندي أصدقاء يروحا ويجوا ل عندي، بس وعينا،

من الضيعة، وصاروا يعرفوا يروحوا ل عندني، أي إجي ل عندهن، نقضي نهار، يقضوا نهار، يعني، معش مثل وقت اللي كنا صغار، يعني، مم، صار الوضع أحسن، قال بدنا نتسجل بثانوية بدناي،--، بثانوية رياق، تسجلت بثانوية رياق، صرنا نتأخر أي والبنات الضيعة اللي معي بنفس الصف، مم، رياق بعيدة، صرنا نتأخر ل نجي بالأوتوكار، ما نلحق، صرنا ندور ع مدرسة قريبة، نجي بوقت أقرب، رجعنا نقلنا عثانوية بدنايل الرسمية، ثانوية أديب حيدر، كمان نفس الشئ، وقت اللي طلعت النتائج بالفصل الأول، ممم، بيطلع إسمي عالtable، بحطوا أسماء الثلاثة اللي بكل صف، أول، ثاني، ثالث، بيطلع إسمي من الأوائل، كل الثانوية "مين حمرة؟ مين حمرة؟"، صار، ما حدا عرفان [تضحك]، إنو، ممم، ما حدا عرفان مين حمرة، صاروا يجوا إنو نقلها إنو هي حمرة طالعة، وكنت أنا، عالأوائل في تنتين، واحد بتذكر إسمه سامر سليمان، ووحدة عبير حيدر، بالثانوية معي، هني شافين حالهن وبدهن يطلعوا الأوائل، طلعت بالإمتحان إنو أنا غالبتهن، وصار في كثير،--، مثل كاتو عصبية، إنو كيف أنا غلبتهن، وحتى رفقاتي اللي بالصف صاروا عندهن فضول "إنت منين يا حمرة؟"، صرت خيرهن إنو نحن بدو، صاروا يقولولي إنو "إحكينا مثل ما بتحكوا إنتوا"، وإحكيلهن عن حياتنا، يعني، مرة بالبالكوريا كمان، إستاذ الأدب عربي، من بدنايل، إسمه محمد سليمان، قام قلي "إنت من وين يا حمرة؟"، أنا كنت كثير ناقشه بالصف، إستفسر عن كل شي، عم بقلي "إنت منين يا حمرة؟"، قتلته "نحن بدو"، قام قلي "ونعم الأصل"، لأن هو بيعرف، دارس أدب عربي، بعرف تاريخ الناس، أنا مبسطة، إنو قدام رفقاتي، عم بق،--، حدا، إجي، بيعرف قيمة أصلي وحضارتي

م.ن.: شو قلك، قلك "نعم؟"

ح.أ.ع.: [00:38:38] ونعم الأصل، قتلته "نحن بدو"، قلي "ونعم الأصل"، صار يغنجني، كل ما بده يقلي شغلة، يا طلعي سمعي، أو طلعي ع اللوح أو جيبلي شي، يقلي، في بيت شعر ل،--، شعر أنجدلسي "إن بالحمرة أرواح مضيعة"، كل ما-- [بصوت عال] "إن بالحمرة أرواح مضيعة"، شو بتطلع [تضحك]، عرفتي؟، كفيت ثانوي، حيننا، طبعاً شوي صاروا يقولوا بالثانوي إنو "كيف بدها تروح حمرة؟" وهيك، ببي كثير صمم إنو يعلمني، إنو "شاطرة"، وبلشت الأحوال تتغير شوي شوي، يعني تقرب أكثر للمدنية، تسجلت بالجامعة، في حدا، صاروا يقولوله "كيف بدها تروح ع زحلة، وكيف بدها تجي؟"، أنا عندي حجة، أنا ورفقاتي، وفي فان بياخذنا وبجيبنا، يعني، هي حجة قوية، إنو "أه، أوكيه، مع رفقاتها، هي سبرها سبر رفقاتها، بتروح مع رفقاتها، بتجي مع رفقاتها"، ومش عم نطلع عالطريق، مثلاً الفان ياخذنا وبجيبنا، وهيك، تسجلت فلسفة، عربي، وكملت، ف هيدا

م.ن.: تسجلتي فلسفة عربية؟

ح.أ.ع.: [00:39:50] فلسفة، إيه، رجعت تجوزت بال93، أول ال93، بأخر 92، تزوجت، إشتربت ع، هو ابن عمي، زوجي، ونحن عننا بالعادات إنو الإبن عم أولى ياخذ بنت عمه، بس أني للحقيقة ما فرضوا عليي، يعني إنو أهلي، وببي بالأخص، كان يحب البنات كثير، كان ما يقبل حدا، نحن 6 بنات و 5 شباب، ما يقبل حدا من أخوتي يوجهلنا أي كلمة، ع طول بيحشم للبنات، مدلنا كثير، وببينا كثير، ف هني طلبوني بيت عمي، قائلتهن أول شي أمي "بدها تتعلم"، كنت بعدني بالبريفيه وقت الحكوا في أول مرة، قال--قالوا، قائلتهن أمي "بنتي بدها تتعلم، وبنتي شاطرة، بكرنا بتدرس، وعندها مجال"، المهم غضوا النظر، بعدين، بالسنة أولى جامعة، صاروا يجوا يحكي تلي مش حكوا في رسمي، يسمع ابن عمي، اللي هو زوجي هلق، فلان بده ياني، فلان بده ياني، وأني مني حلوة يعني، شخصية بارزة، بس كنت إذا بروح ع عرس، كأنو ما في حدا بال-- وأني ما بحب حدا، ما بدي حدا، يصيروا كل الشباب بالعرس يجبوني أني، يستحلوني أني، يا عمي ليكوا البنات مطبنة حالها، أنا ما--، ولا--، جربت مرة، إذا ع عرس ولأشي، بالثياب اللي لابستهن، وبعده مبدأي بالحياة، هو الثياب، هلق في روح فيهن ع أجر، في روح فيهن ع بيروت، البشتغل فيهن بمشي فيهن، هيك أني طبعي، شعراتي متلك، بكلة ما بحط، هيك، بمشطنهن، كنت متي محببة، ممم، فيقولوا "هيذا بده ياه، وهيذا بده ياه"، حط إنو بده ياني، المهم، أنا صار بدو بصير خلاف بين بيت عمي وأهلي، وقلت أنا، فكرت بالموضوع، إنو قلت أنا يعني من اللبنانية ما ح أخذ، حسيت إنو ما ح إرتاح، لأنو نحن، هلق أني بالنسبة ل إلي، أني ما عندي شي فرق، بس ممكن هيدا المجتمع اللي بدي فوت عليه ممكن تجي يوم يحسوني، يقولولي شي، أنا لأنو أنا ما يقبل حدا--، حساسة، من طبعي هيك، قلت ممكن إعرض عندهن ل--، أي شي، يمكن حدا يزعل مني يقول "هي بدوية"، مثلاً، قلت أنا ما ح أخذ لبناني، بدي أخذ بدو، ومذال بدو-- ما ح أخذ لبناني، يعني ابن عمي، هو حبني كثير زوجي، ابن عمي وأهلي صاروا يهددوهن بيت عمي، عمي قله ل ببي "ما بتخطبوها ل حدا وكل شي ونحن طبيين، بس نموت نحننا كلنا، ساعتها خطبوها إنتوا مثل ما بدكن"، ف قلت أنا "باخذ ابن عمي"، وجوزي، ليكي، متفهم، حب حياتي، حب طبيعتي، حب عقليتي، عرفتي؟، وكان متفهم معي منيح، طبعاً عملت بعض الصعوبات أني وياه، والمجمع بعد ما تجوزت كمان تغير عليي لأنو عند أهلي شي، وهون صار في شي، صاروا ينتقدوا لبسي، ينتقدوا إنو كيف شالحة، حتى عند أهلي كان ينتقدوا،

مين؟ بس يروح لعنا بدو، يجي من بعيد، هلق أهل الضيعة وجيراننا تعودوا يمكن ع منظرني، إنو بلبس كثير ح--، هيك، نص كم، بلبس جينز، مثل نور مثلاً، وراخية شعري، هلق يحكوا أول شي، يحكوا، أنا طنش، وببي يقلي مثلاً "حطي ع راسك"، بطنش، وهيدا أطنش، وهيدا يحكي كلمة، أعمل حالي مش سمعانة، المهم، بالنهاية تعودوا، ممم، تعودوا عليي ب هيدا المنظر، وحبوا نفسييتي الكل، كل الجيران كثير يحبوني، الكبار والصغار، الختبار يحب يعيطلي يقعد معي، أي إذا شوف مرة، إتعاطي مع الكل ب طيبة، وهيك، يمكن نشوا شك--، منظرني، صاروا يحبوا حمرة فكرها، تعاطيها معهن، ممم، بس وقت اللي يجوا ضيوف ل عند أهلي من برات الضيعة، ي--، ينصدموا، إنو يفكروني أنا مش--، إنو لبسنا كان غير، هلق بعدين، هلق تطور، صاروا يلبسوا، في بنات هلق شالحة، وبتلبس جينز، هلق، بس قبل ع دوري لأ، كان كله لبس بدو، لبس طويل، شو جينز؟ وشو حدأ--، مع إنو البدو ب لباسهن ببينوا شعرهن من قدام، مش يغطوا كل شعرهن، بيجدلوا جدولة من هون، وجدولة من هون، بلبسوا هيك وحدة، لبسهن كثير حلو، بس خلص، إنو حاطة شي، مش هيدا لباسنا، مش هيدا لباسنا، إنو لبس عم تلبس مثل الفلاحين، عرفتي؟ ف، أطنش، المهم رجعت هون إتعور يقولولهن [؟؟؟ غير واضح؟؟؟]، كان يقلي ببي "عيب، ما تطلعي، هلق بيحكوا علينا"، أي أطنش، وين ما يجي لاقني حدال عند ببي، يمكت هي عطتني قوة الشخصية، دلال ببي، ووين ما يجي ل عنا ضيوف، إتمجلس أي مع [تضحك] الرجال

### [ينقطع التسجيل ويواصل]

م.ن.: إيه

ح.أ.ع.: [00:45:16] إيه، ف، علي كان نفسيته كثير منيحة، حب شخصيتي، قلت أنا "بتفق أنا وياه، وإبن عمي، بضل إنو بين قرايبي" [صوت من الخلفية: "ماما!"]، باخذ حريتي أكثر بالحياة، ممكن هني يستوعبوني أكثر، ومنهن فيهن في حدا يكون أعلى مني وبيفرض شي عليي، أو بيهتني بشغلة أي ما إلي ذنب فيها، ف وافقت، وتجزنا، هلق برجع لطفولتي، إنو كيف قضيناها، حكيتلكن عن المدرسة أي، بالبيت، هيك، كانت شخصيتي كثير قوية، مين ما إجي لعندي، لعند أهليين كان بيتهن مفتوح، بيجي لعندهن كثير ناس وهيك، إتمجلس أي مع الرجال، [صوت من الجوار: أعطيني 15 ألف من الجزدان]، إتمجلس مع الرجال، بشوف هيدا شو بيحكي، وهيدا شو بيحكي، وبتعاطي، جريئة، من أولتي، ليكي، هو الدلال بيقوي الشخصية، الطفل اللي بيتدل بتقوي شخصيته، غير الطفل اللي بيخلق مقموع، عرفتي؟، اللي عنده قمع بتضل شخصيته ضعيفة، بيضل في عنده خوف، أي بعدين صار عندي الخوف، هلق، آخر شي ب حياتي، بالأول ما كنت خاف من شي، هلق، بعدين، صرت حس ب خوف، بس إجي، صار عندي ولاد، بس قبل ما بعرف خوف، ونيتي وين ما روح ووين ما إجي ما بفكر بشي، خوف، إنو خاف من شي، ما عندي هيدي الناحية بحياتي، ف منطقة، وأعمل، وصاحب الكبير والصغير، بعد الضهر كنا--، الإشي اللي كنت حبها كثير، كنا نسرح مع ستي بالغنمات، نروح عالسهل، أو يعزلونا ال--ال--، نحن منقلهن "طلبان" هني بيخلفوا الغنم، ببسرحوا الغنم لحال، يعني، وهو اللي بيخلفوهن لحال، منقلهن الطليان نحن، يعزلونا الطليان، نحن منروح نسرح فيهن، نقعد نلعب، وبتروح الطليات نتهبّ بحدا زارع عدس، شعير، ببجي الفسديات ل ستي عشية [تضحك]، الأولاد خزبوا، الطليان هاتين بالعدس، هاذين مدري شوي، ويعني هي كانت حياة كثير حلوة، وبتذكر إنو هون سهل البعر كان كثير كله خضار، ما في بيوت، كنا نشوف ضيعتنا ل هون، نشوفهن عن بعد، عرقتي، وكله بالربيع هالخضار، ترم السراحة، بلبشوا يطلعوا الغنم، هالزهور، هالخضار، هالربيع، منلعب، منلعب بالشعير، منلعب بالقمح، منلعب باللي بدك ياه، بعد فترة وعينا، إشتروا أهلي بقر، لأنو--، قبل العرب ما بحبوا البقر، بحبوا الغنم، صارت الحياة إنو البقر بيعطي حليب أكثر، وب--، وكيف، ما بده سراحة كل يوم، حدا يسرح فيه، فيكي تحطيله وهو مربوط

م.ن.: بتسرحوا يعني بتمشوهن مسافات؟

ح.أ.ع.: [00:48:32] نسرحهن، يروحوا يرعوا بالسهل، يسرحهن يعني بدنا نروح محل ما طالع حشيش، طالع شعير، طالع--، بيرعوا، يعني أحلى ما نشتريلهن علف ونحطلهن، نرعى فيهن. أي ما حبيت البقر، كنت خاف منهن، ولا ولقت، بحب الغنم كثير، بس البقر ما إجي ع مجازي، خاف من البقرة، روح مع أختي أكبر مني، خياتي التنين أكبر مني، هني بيشتغلوا البقرات، هني بيهتموا، أي بروح بلعب، أيه، أول شي، أول موسم سراحة بيجي بالربيع، وقت اللي بينبت هالحشيش، بتكون العيون والسكورة بعدها ملانة مي، منجبل وحل، منلعب بالمي كل النهار، منلعب بالغيض، كان في غيوض، الغيضة يعني مثل غابة، حور، نلعب طميشة، تخبية، نتصيد، كان موسم كمان العصافير، بتعمل أجج، موسم إنو تفقس العصافير، نطلع عالشجر، نتعربش، نشوف الأجج، إنو هيدا الجلوبوط، هيدا إلو ريش، هيدا بيطير، هيدا إجت إمو أيه، وهيك، نقضي وقتنا هيك كله، الطفولة كثير حلوة كانت الطفولة

م.ن.: كنتوا كثير قراب عالطبيعة يعني، بتقضوا كثير وقت بالطبيعة؟

ح.أ.ع.: [00:49:43] ما في إلا الطبيعة قدام، ما في شي، لا في سوق، لا في محلات، ما في دكاكين أصلاً كان.

م.ن.: حمرة، يعني إنت ع وقتك، وقت خلقتي، أهلك كانوا بطلوا رحالة يعني؟

ح.أ.ع.: [00:49:58] إيه، أنا وعيت كانوا عنّا بيت، كل اللي من جيلي كان عنا بيوت، نحن، خلقت أني، كان عنا بيت حجر عادي، مثله مثل أي بيت مدني يعني، ممم، بيرجع ممم، شو بدي خبيرك بعد عن الطفولة؟، هيك أهم، أكثر شي هيك. كانت أمي مثلاً أول الشتتي تاخذ حمص، هيدا اللي أكت--، مع إنو نحن عن غيرنا كنا كثير مغنجين، غير الولاد الثانيين، ممم، تاخذ حمص عالمحصّة ع بعلبك، كانوا كل سنة ل يروحوا ع بعلبك، كانت أقرب مدينة لنا بعلبك، يجيبوا مونة السنة كلها، تاخذ أمي حمص، تشتري مثلاً 20 كيلو، 30 كيلو حمص، إذا ما كنّا نحن زارعين، وبلشوا بالأخر أهلي يزرعوا كمان، ما فاتوا بحياة الفلاحين اللبنانية، صاروا يزرعوا عدس، يزرعوا شو اسمه، يزرعوا قمح، يزرعوا حمص، نروح نحصد نحن، أني مشاركة كمان، روح أحصد معهن، بس بتعرفي ولد، مش الإتكالية عليه، بس نروح مع أهلنا، نركب عالمورج، وقت اللي يجرشوا، كانوا يجرشوا عالمورج، الحمص والقمح والعدس، ما كان في مثل هلق مكناات تفصل القمح عن--

م.ن.: شو هو المورج؟

ح.أ.ع.: [00:51:18] المورج شقفة خشب هالقدّ، ويكون بكعبها، بالمركز البريطاني بالأردن شقنا واحد حاطينه، مورج، ممم، يكونوا حاطين من كعبه مسمار طخين، داقينه فيه، وعاكفينه هيك، بمشوه أو ع بقر، ع بقر عجول، او ع حمير، بيربطوا المورج ب هيدا، بيركبونا نحن عالمورج، لأنو المورج لا بده حدا ثقيل، ولا بده حدا خفيف، ما ي--، ويقوموا، هيدا لنفترض عدس، قومة قشط هالعدس، جابوها من ال--، حلشوها، وجابوها عالبيدر، البيدر بقوموا هيدا العدس، ويبصيروا يشروا داير من دار، هيجا البيد--، هيدا الكوشي هون، يشرشروا هيك بال-- هي اللي إسمها الشعوب، هيك إلهها رفش، إلهها هيك عودات بحطوا داير من دار، وبيجيوا المورج، جازه لنفترض حمار، بيركبوه عالحمار، طبعاً إلو طريقة، وإلو حبال، أو شي، بصير يمشي، هيك، نحن منركب عالمورج، ل ننقل شوي، ل--، بعد ما يخلصوا هو، يصيروا كل ما ينطحنا هو، يرجعوا يحطو من الكوش، كل ما ينطحن يرجعوا يحطوا، ل يخلصوهن كلهن، بيجمعوهن، بينطروا ل يطلع هواء غربي، أكثر شي بيطلع عنا هون هواء غربي، بيدروهن هيك كمان بالشعور، بصير يفصل التبن بصير ع ميل، والحب بيضل محله، بيعبوهن، وبيبيعوهن، بيمونوا منهن، إيه، صاروا يزرعوا بعدين، شوي، بعدين هلق بطلوا، معش زرعوا شي، بالأخر هلق رجعوا، بالأخر كبروا أهلي، وكلنا تجوزنا، معش--، معش زرعوا

م.ن.: كانوا أهلك محافظين عالعادات والتقاليد تبعنك وهيك، ولأ بتحسي--

ح.أ.ع.: [00:53:10] ليكي، بالنسبة، ضلّو إيه، قدّيش إنخرضوا، ضلوا محافظين، يعني هيبي كانت عم ب تزول شوي شوي، بس مش فجأة دغري نسوا، بعضهن حافظوا عاللباس، عالغذاء الطبيعي، مثلاً أمي كانت عنا بقر أو عنا غنم، تعمل لبنة، تعمل سمنة، تعمل كشك، يعملوا أي شي، كله منعمله نحن ع إيدنا، طبخ، مثلاً إذا إجانا ضيف، بيدجوا ذبيحة، بيطبخواها، بيسلقوا اللحم، بطريقة كثير طيبة بيطلع، بيطبخوا فيه رز أو برغل، بيعملوا مناسب بيقولولها، بالنسبة ل عادات الزواج، حافظوا فترة كبيرة، يعني البننت إذا بدها ابن عمها ما حدا بياخذها، مثلاً، كيف بدي قلك، مثلاً عادة أخذ التار، إنو بياخذوا ب تار، إذا حدى قتل حدى، بدهن ياخذوا ب تاره، هيك، اللباس، الأعراس عندهن، كيف طريقة الأعراس عندهن، حافظوا عليها، بعدها لهلق تقريباً طريقة الع--، تغير اللباس، طريقة الأعراس صارت العزوات بعدها تقريباً مثل ما هيبي، مما تغير زيادة فيهن

م.ن.: كنتي عم تقولي إني للباس، كانوا يربطوا، يعملوا شعراتهن جداديل وهيك

ح.أ.ع.: [00:54:38] جدولة من هون، وجدولة من هون، بيعملوا هيك لفحة، بتشبه المنديل هيدا، بس بتجي سودا، في وحدة بيقولولها عصبية، بيعملوها هيك، من هون بيتركوا غرة مبينة، يعني هيك، بيعصبوها، من هون غرة مبينة، من هون شوية شعر، وهدا اللي بيلسوه هيك، بيلقوه تحت العصبية، يكون كثير شفاف، بينوا حلقاتها البدوية، بين شعرها، بين رقبتها

م.ن.: إمك هيك كانت؟

ح.أ.ع.: [00:55:06] أمي وإخواتي، إيه، كانوا هيك يلبسوا

م.ن.: بس ليش تغير هيدا الشئ، شو صارت بطلتوا تلبسوا هيك؟

ح.أ.ع.: [00:55:13] تطور الحياة، صاروا يقولوا، بلشت البنات والشباب يفوتوا عالمدارس، صاروا يشوفوا بالمدرسة إنو البنات ما فيها تضل لابسة لباس البدو بالمدرسة، صارت بدها تلبس مريول، بدها تلبس جينز، أو بوط، أو--، شو هلق، أي مثلاً طلعت بالمدرسة، شو--، صرت إلبس مثل رفقاتي اللي بالمدرسة، بنتي نفس الشئ، الثانية تأثرت فيها، الثانية تأثرت فيها، الثانية راحت بالمدرسة، الثانية إشتغلنا ب معمل، الثاني مثلاً--، هيك، صاروا يطلعوا شوي شوي، اللي كانت تلبس عصابة، يقولوا "شو هي هي الطربوش اللي حاطينها؟" صاروا يحطوا لفحة، مندبل هيك يلقوه، ويلبسوا طويل، يلقوا مندبل، ويلبسوا عباية، بيتاتهن معش يلبسوا، صاروا يلبسوا مدني، مثلاً، في منهن محجبين، في منهن مفرعين هلق، معش تمييزهن من المجتمع اللبناني، بتحسي نفس اللباس صار، اللي مثلي تلبس ل هون المحجبة، في منهن مثلاً المفرعة بتلبس أقصر، حسب، كل وحدة هي ذوقها، كيف تلبس، بس بعد في مثل أمي، شافتها نور، هو النسوان الكبار، بعدهن بلبسوا نفس الشئ، ما تركوا لباسهن

م.ن.: إمك بعدها ل هلق يعني محافظة عاللباس؟

ح.أ.ع.: [00:56:33] نفس اللباس، وكل النسوان اللي من جيلها، أصغر شوي، أكبر شوي، أيه، بعدهن محافظين عاللباس هو ذاته

م.ن.: في عادات وتقاليدها بتتذكرها من إنت وصغيرة، بتحبيها، بتمبسطي فيها، بطلت موجودة هلق، بتزعلي، بتحسي إنو كان شي حلو؟

ح.أ.ع.: [00:56:49] إيه، في الأعراس كانوا يجيبوا واحد يدق عالمزيرة أو عمجوز بيقولوله، هيك، وهيدا مش كل العرس، وكانوا هني البنات يغنوا بالعرس، أو شتين، أو بنات يغنوا، كانت الأغاني عندهن مرتجلة، يألّفوا هني بساعة الساعة، تطلع معهن، كيف الشاعر وقت اللي بيرتجل قصيدة من وحي المناسبة؟، هني تطلع عندهن اللهجة ذاتها بس يألّفوا عليها، حسب وضع العرس، يجيبوا تأليف عليها، إثنين يقولوا عالدبكة، وتنين بيردّوا وراهن، عرفتي؟، بيردّوا هوديك نفس ما يقولوا، بيعيدوا المقطع مرتين، بيردوا، ويرجعوا يبتلعوا بمقطع جديد، بتحسي العرس، يعني هيدي أول ما بلشت أو عى كانت هيك الأعراس، تحسي العرس رايق، هواء، كان ما في هالجرأة عند المرأة والولد، كانوا المرة، النسوان صح، يدبكو مع بعضهن، ما في، كانوا مثل هلق، يعني ما كان في إنو المرة بتمسك بايد الزلّمة، أو--، عادي، يدبكو مع بعضهن، بس بتحسي إنو الولد ملتزم أكثر، المرأة ملتزمة أكثر، ما يعملوا هالفوضى بالعرس، وهالضجة، وهلق هال--هيدا الDJ اللي كثير صوته عالي، اللي بيطوش، بتجي من العرس مطوشة، بتسمعيه، بتحسي بس صريخات بالعرس وبس، كأنها قايمة القيامة، لأ، كنتي توصلي ح--، توصلي للعرس، أول الدبكة، أو بيوت شعر، مش مثل صالات هلق، بيبنوا بيوت شعر، شي 5-6 بيوت ع رؤوس بعضهن، بيفرشوهن مثل هالفرشات، بتقعد العالم عالارض، بس اللي-- ولد، مرأة، ما بتشوفيه بالساحة، كل العالم قاعدة، وبس اللي عم يدبكو، رقصة ما كان في بالأعراس عنّا قديماً، كلو دبكة، والأغاني عم تسمعيها برواق، بتتبعني، وما في ضجة، وكلو كان ع رواق، هلق صار مزعج العرس، معش هو حلو، تغيرت، صاروا يعملوا بالصالة، يجيبوا DJ، يجيبوا مطربين، مم، صاروا مثلنا مثل المجتمع اللبناني، معش حلو، هيدا كثير بحزن عليه. وبحب إنو كانوا يحافظوا عاللباس، لو بالمناسبات، يعني لو بالمناسبات إنو يلبسوا لباس بدو، يرجعوا للتراث، بأي مناسبة، هلق في هي السنة، من سنتين هيك درّجوها، صاروا مثلاً يجوا غروب [group] صبايا يلبسوا بدو، يجيبوا ثياب لستاتهن، ول... يطلعوا كثير حلوين، تمبسط العالم كثير فيهن، يمسكوا عالدبكة حد بعضهن، والشبابا يلبسوا هيك لباس بدوي كمان، مش زيادة، مش إنو الكل يلبس، هيك، لمحّة، مشهد، يلبسوا شوي، يروحوا يشلحوا، عرفتي كيف؟، واللي بيزعني اللهجة، بحب إنو نحافظ شوي ع لهجتنا، هلق كثير صاروا عم يحكوا مدني، حتى هني البدو بين بعضهن، صاروا عم يحكوا مدني، نسوا اللهجة كلها، يعني، بيعرفوا شوي، ما بيحكوا، بكرّا إنهن ما بيحكوا شي، ما بيعرف شي، ضاعت الأصا--، ضيعنا نحن شو كتّا يعني، مفروض أي بحب أكثر شي كان يحافظ شوي عاللباس، وعاللهجة البدوية، تضل محكية، لو حتى لو بين بعضنا، بأدنى الحالات، نضل نحكي، أي مثلاً راحوا ولادي بالمدرسة، يقولولي "حكّي معهن مدني، بكرّا بالصف ما بيعرفوا يحكوا مع المعلمة"، قلنهن مثل ما أي، لأنو إذا ما حكيتهن بدو بالبيت بكرّا ما بعودوا يعرفوا يحكوا، لأنو اللهجة العربية أصعب، صعبة، هني بيتعلموا بالمدرسة، معهن معهن، يوم ع يوم، بيتعلموا، بيكسبوا اللغتين، ضليت هلق، ولادي، مع إنو أي أكثر شي متعلمة، وإنو مفروض ولادي ما يحكوا، حسب نظرية العالم، كانوا يقولوا "ولاد حمرة بدهن يطلعوا مدنية"، اللي هني ما تعلموا، بيحكوا مع ولادهم فلاحين، أي بحكي-- ولادي كثير لغتتهن لهجتتهن



البدوية صحيحة، بيحكوا مطبوظ، اللهجة البدوية الصحيحة، بيحكوا مطبوظ، ولادي أنا خاص، غير عن اللي من جيلهن كلهن، بيخربطوا بالحكي

م.ن.: إنت بتحبي تضلك محافظة عهالعات والتقاليد، بتحبي إنو تسترجعيها؟

ح.أ.ع.: [01:01:25] إيه ليكي، اللي ما إلو ماضي ما إلو حاضر، يعني أنا بحب، التطور منو غلط، الثقافة الحديثة، في شي منها غلط وفي منها-- وكل شي، كل عصر إلو حسناته وإلو سيئاته، وكل حضارة إله حسناتها وإله سيئاتها، وكل شي صار هيك، في تناقضات عطول، أنا بحب إنو حافظ عالعات البدوية الأصيلة، اللي هي كثير حلوة، حرام تدر وتنسى، وأخذ من الثقافة اللي هو مفيد لإلي، مش الثقافة المزيفة، الثقافة العلمية، شي بفيد، العلم والمجتمع، التطور العلمي، هيدا بحب كثير إكسبه، وبحب إني ما إخسر عاداتي الحلوة، في عادات كثير حلوة، وفي عادات سيئة، السيئة بطويها، بحب هالعات الحلوة ضل محافظة عليها، كثير حلو، لحتى الإنسان يضل إلو جذور، ما في حدا إلا ما إلو جذور، حتى بالحياة المدنية بقولوا "شجرة العيلة"، ليضلوا يعرفوا جذورهن، يفهم الشخص منين هو إجي، وين، وشو هي هويته، نحن، هلق بعد في جيل ما بيعرف نحن، مفكر إنو نحن سوريين كنا، إنو جينا من سوريا يعني نحن سوريين، أني كثير فهمت ناس إنو نحن منو--، مني ضد السوريين، ما هني شعب متلي متله، مش أقل مني هني، بس ما بيعرفوا أصلهن هني، جذورهن، منين إجوا، هي شو؟ عدم ثقافة، هي عدم إنو-- حدا ما عم بيلمهن، وهو الكبار، اللي بكر شي مات، شي بعده ح يموت، ما هو هني اللي بيعرفوا. مفروض إنو نحن نستفيد منهن، ونشوف نحن-- اللي ما عنده هوية ما عنده شي، صح نحن كان-- وهلق أني بحب إنو تكون الدول العربية كلها مفتوحة، ما في حدود، حدود بلا حدود مثل ما قالوا، بين كل الدول العربية، نرجع مثل قبل، بس بتمسك بهويتي البدوية، وبجذوري، أنا بعتر إنو أنا بدوية، بحب حافظ ع هيدي الميزة، يمكن هي مش ميزة بالنسبة لغيري، بس أنا بعترها ميزة خاصة في، أنا من جذور بدوية، تعلمت، ثققت، رحت مدارس، رحت جامعات، عملت أبحاث، بس أنا أصلي هيك، هيدا هو، لأنو أصلي منو معيب، بالعكس، أصلي هو عز وكرامة، أصلي شي بعتر فيه، هني البدو هني أهل الكرم، أهل النخوة، أهل الحمية، أهل الضيافة، عندهن عادات كثير حلوة، كنو للضيف، كنو للبيستجبروا حدا، كنو لإغاثة الملهوف، مثل ما بيقلوا بالفصحة

م.ن.: إغائة ال؟ كيف يعني؟

ح.أ.ع.: [01:04:27] الملهوف، مثلا عندك عادة عند البدو، إذا أني-- إذا واحد قتلك خيك، عرفتي؟، صارت كثير قصص من هي القرنة مثلا، واحد قتل إبنه، بيجي بيركض عيبو، عيبو، بفوت بقله "أنا داخل عليك"، بيعفي عنو، خلص هيدا دخل عالبيت، صار دخيل، هلق بعدين في قضاء بحاسبه، بس إنو دخل ما عاد حدا يق-- ما بينقتل، وفي، أنا ما حكيتك عن الشرع عند البدو قديش حلو، أنزه، أنزه قضاء، واللي ما أخطأ لهلق هو القضاء عند البدو، البدو ما عندهن محاكم، وبعدنا نحن لا نزال هالاشيا محافظين عليها، بس تصير أي مشكلة، بتتدخل الدولة، بينحبس، وبينحكّم، بس آخر شي عالصلح، القضاء ال-- هو العشايري، هو اللي بيحل المشكلة

م.ن.: قلتلي كان في شيخ هو ال--؟

ح.أ.ع.: [01:05:29] الشيخ غير الشرع، الشيخ هيدا بكون شيخ القبيلة، مثل هلق مثلا عندك إنت في محامين، وفي مسؤولين بالدولة، بس هني القضاة ما خصهن ب هو، نحن نفس الشئ، في عنا قضاة، هني منقلهن بلهجتنا الشرع، هيدا شرع، هيدي-- لا تعلم بمدارس، بيكسب خبرة من غيره، بس بمدارس ما درس قانون، ما درس حقوق، بس بتحسبها سبحان الله موهبة، ذكاء من عند رب العلمين، بي فصل بكل القضايا الليتبع--، قضايا القتل، بقضايا السرقة، بقضايا حدى تعدى عالثاني بأي شي، قضايا الشرف، مثل ما بقولوا، إنو بنت نخطفت، أو امرأة تعدى عليها حدا، أو-- هو كلو بيتقابلوا عند الشرع، وهو الشرع بي فصل بيناتهم، وقلما، نوادر، ما بيذكرولك حادثة إنو الشرع البدو، إنو غلط بمحلات، والشرع عند البدو ما بيتبرطل لأي شي، بس أخذ منك قسم إنو بالله بقول، بيحلفك الشرع، بيحلفك "بصوت الله"، بيحلفك 3 مرات إنو بتحكي الصدق، خلص، بيقتحوا محكمة مثل المحكمة المدنية، بيدعوا ناس، اللي بده يحضر يجي، بيحلفك، كل واحد بقول حجته، كل واحد بقول حجته، هو بيشرعلهن، بيشرعلهن بما يرضي الله، والقانون-- أني مرة مدري وين قريتها، إنو هيدا القانون المدني جابوه من شرع البدو، من القرآن الكريم، هيدي القوانين اللي حطوها، أكثر شي رجعوا فيها للشرع البدو، كيف يفصلوا بين--، إذا أنا هون، الشرع عنا في واحد، بس هلق ختير، ومعش-- بيول علي المولى، يا ريت لاحقينه، كان هيدا هون هو يشرع عنا بلبنان، بسوريا بعد في ش--شيو--مش--، مش قضاة، مش قضاة، شرع منقلهن نحن، ما منقلهن قاضي.

م.ن.: بعمل pause؟

ح.أ.ع.: [01:07:45] إيه

[ينقطع التسجيل ويواصل]

ح.أ.ع.: [01:07:46] المرأة بالمجتمع البدوي، في عندها إشيا منصوفة فيها، في إشيا كثير مقموعة فيها، الإشيا المنصوفة فيها إنو عندها حرية، عندها جراءة، حسب يمكن وضعهن المعيشي، كانت، بالوقت الكانت المرأة البدوية تختلط مع الرجال، وتفتح بيتها وتستقبل ضيوف، كانت المرأة المدنية مثلا محجوبة، كان في قبل هي التمدن، موجة التمدن، من بعدهن بسوريا مثلا شوي ما بيوажوها، الحلبية ما بيوажوها رجال، بسوريا أكثر شي، النسوان ما بيوажوها الرجال، نحن هون شوي طلعلنا منها. كانت هي بتقوم بدور الرجل والمرأة عند البدو، مثلاً هي بس بدهن يرحلوا إجراها وإجر الرجل سواء، إذا كان، إجاهن ضيف والمرأة لخالها بالبيت، ممكن لأنو كانت البيوت مشرعة، مثلاً، ما يخافوا من شي، تستقبل الضيف، وإذا إضطرت بتدبلحه، بتعمله غداء، بتقله هلق بيجي صاحب البيت، إذا حدا إستجار عندها، بيحترموا جيرة المرأة البدو، هي شغلة كثير حلوة ومهمة، بقولوك "أني دخلت عالحرمة"، الحرمة، المرأة يعني، هي خط أحمر، بقولوك، إذا الواحد أخطأ بقولوك "كرامة هالمرأة"، مثل كان حلقته ع شي عظيم، أو "كرامة الولد"، هو الطفل والمرأة عند العادات المضبوطة، ما هلق نحن نسيناها كمان، هلق معش إله قيمة هالشغلات، قبل بيقولوك "أني داخل على الحرمة"، أو "على هالولاد الصغير"، أو إنت عاملة غلط، مثلاً، زلمة عمل غلط، بياخذ مرته أو بياخذ ابنه، بقله "عفيت عنك كرامة هالطفل"، أو "عفيت عنك كرامة هالمرأة"، المرأة يعني إله كرامة كثير، كثير، إله عز، بحس إنو بهيدي المواقف في إله عز المرأة، يعني وقت اللي بيكارموا شغلة ع يد المرأة، هي شغلة كثير عز للمرأة، كانت تختلط بس قلما تخطئ النساء، كان عندهن حب، بصير في الحب، العشق ما--، موجود بكل وقت وعصر، بكل العصور، بكل المحلات، بس كان العشق كل العشيرة بتعرف هيدا بحب هي، كل العالم بتعرف، ما بيعتبروه محرم، بس ما فيهن ياخذوا مثل هلق، بيجمعوا عند ناس، بيضل شي بدهن يشوفوا بعضهن عبر وسيط، مرسال بين بعضهن، عرفتي، هي، يعني كان كثير شي إلو حدود، بس إذا -- ما فيها تشوفه، إلا ممكن تشوفه بالمخفي، هيدا أكيد حتشوفه، بس علنا تقعد معه، تسلم عليه عالطريق، لأ. عرفتي؟، بس بيحللونها إنو تحب. ف كسبت جراءة يمكن حسب طبيعة حياتها، هي عم تنتقل مع الرجل، عم تنصب ساعة البيت، ساعة بيعدوا، ساعة بيبنوا البيت، وساعة بروحوا عالمي، وساعة بدهن يسرحوا بالغنم، وساعة بدهن--، كانت إختلاطها بالرجل عبر، يعني، إكتسبت جراءة وقوة، قوة، يمكن، قوة جسدية وقوة جراءة، وقوة شخصية، عرفتي؟، وفي نسوان عند البدو بينحكي عنهن إنو، بيقولونها "أخت رجال"، يعني إلهن دور، ضرب سيطهن عبر الأجيال بيقولوا عنهن، وفي جمال كثير عند البدو، جمال البدو، بيقولوك في-- هلق مش زيادة في جمال، بس قبل بقولوا جمال البدويات-- حتى بس صرنا نجي لهون البدو، المجتمع المدني اللبناني صاروا يطلعوا أغاني لإلهن، لهني بأعراسهن عن البدو، مثلاً يغنوا "العروس حلوة يا بدوية"، يغنوها غنية طويلة عريضة "حلوة يا بدوية"، يلبسوها لبس بدو، يروحوا يستعبروا منها لباس البدو، ويلبسوا العروس بدوية، ويصيروا يغنوها "حلوة يا بدوية، وجيتي من أرض البرية"، وإلها معاني، مثلاً إذا شي شب قامته حلوة، بيقولوا "مثل الأمير، مثل أمير عرب"، ال-- بيستعملوها، في عندهن جمال البدو، جمال طبيعي صافي، ممم، وشو بعد الشغلات ميز إنو، في شغلات المضطهدة فيها إنو مثلاً وحدة حبت واحد، أهلها ما بيعطوها، هلق إذا [01:12:46] ما أخذته، بتأخذ سيط، إنو عزت أهلها وحفظت كرامة أهلها، وما خالفت، بتأخذ سيط عبر العصور، يعني عبر وقت، فترة طويلة، وإذا طلعت خفيفة، أو بيقتلها، أو بحياتها بتموت، ما بتشوف لا أهلها، ولا ولا--، ولا إخوتها، ولا ولاد عمها، ولا قرايبها، بصالحوا عليها إنو "ما منقتلها"، بصالحوا، إنو بس "هيي بحالها ونحن بحالنا"، بس إذا قدروا، ما تدخلت عالم إله قيمتها، وتوجهت، بيقتلها وما بيسألوا عليها

م.ن.: هول الإشيا اللي عم تقيليلي، الحسنات والسينات، كمان بعدها موجودة ولا كمان عم تقل مع الوقت؟ عم تتغير؟

ح.أ.ع.: [01:13:28] لأ، قلت، تنيناتهن قلوا، الحسنات قلوا، والسينات قلوا، هلق مثلاً، قلت هي الخفيفة، بس ممكن إنو بعد مثلاً 20 سنة، قتلوا 2، حتى كمان حتى ما صار في خفيفة، لأنو صاروا يعطوها مثل ما بدها، صاروا يخافوا، يقولوا أحلى ما نبنتي، تخطفه، منصير نوع ب بلوة كبيرة، صاروا عم بيحترروا شوي شوي، ليتحاشوا إنو--، وفي الغصيبة، بيغصبوا البنت باين عمها، هي كثير كانت واردة الغصيبة، ما بتحبها، بيعطوها ياه غصب عنها، هي كثير منها حلوة، منها حلوة هيدي العادة، بيقولونها "خلص، ابن عمك هيدا"، بينزلها عن ظهر الفرس بيقولوا بالعامية، لأنو قبل يزفوا العروس عالفرس، إنو إذا كانت مزوفة عروس، عالفرس، بينزلها، وبيأخذها، وبيقلن "أني ابن عمها"، ما إلهن شي عنده.

م.ن.: مش كثير يعني بعد بياخذوا من اللبنانية أو هي؟ بعد ما في هالقد إنخراط-- إختلاط؟



ح.أ.ع.: [01:14:35] مش كثير، هلق نحن آخذين هني اللبنانية منا أكثر، بس نحن مش آخذين، يعني، هون بحوش النبي في شي يمكن وحدة أو تتين آخذين لبنانية، 3، إيه، 3-4، ما يعرف قديه، بس نحن آخذين أكثر، نحن منجيب من المجتمع اللبناني أكثر، آخذين، في كثير نسوان عنا لبنانية

م.ن.: ممم، إنو الرجال بياخذ بنت لبنانية أكثر من--؟

ح.أ.ع.: [01:15:05] إيه، إيه، أكثر ما إنو نحن منعطي لل--، يمكن هني ما بدهن، ما يعرف، أو نحن صعبة، أو مبدنيا، يمكن هلق معش في عندهن مشكلة، بس قبل صعب بقولوا "منعطي للفلاحين" مثلا، هلق أني لوحدي قررت ما بدي، ما حدا ضغط علي، والمرأة بكل المجتمعات هي عطول مضحية، المضحي الأكبر، هي بكل المجتمعات، هي المضحي الأكبر كأم، كمرأة، كأم، ك بنت، ليكي ك بنت، بتعز إختها وببها، بتضحي كرمالهن، كمرأة، بتضحي كرمال جوزها وولادها قد ما بدك، وين ما إنوجدت المرأة، بالنسبة إلي--، هلق في نسوان إيه، ما بيضخوا بس بشكل عام، مجتمعنا أكثر شي، وين ما إنوجدت المرأة بتحسبها مضحية، هلق لحد عنا، هون مثلا بضيعتي، حوش العرب، النساء كلهن يعتبرهن من المجاهدين، كيف المجاهدين عم بجاهدوا داعش أو تنظيم إرهابي؟، هني هيكي، بيشتغلوا برا وجوا، هاكلين المسؤولية، بيشتغلوا برا وجوا، الرجال بتشتغل هيكي، بس المرأة عنا كثير مضحية، كثير عليها مسؤوليات، هي كل شي بدها تقوم فيه، عرقتي؟ فتحسي عنا، يعني، ما نراح من حدودها، إلهها وجود، بس بس يصير الشيء المظبوط، بقولوك "هي امرأة"، ما بييسألوا عنها

م.ن.: مثل شو؟

ح.أ.ع.: [01:16:54] إيه، مثلا، يعني، لنفترض هي وزوجها وصلوا لمحل إختلفوا فيه، بتحسي ما حدا بيعطيها حق، كل المجتمع يقوم عليها "إنت لازم تضحي، إنت لازم تكوني--، إنت لازم تسكتي، وإنت لازم تحافظي عبيتك"، الرجل إذا غلط ما بحاسبوه، بحاسبوا المرأة، مثلا، لنفترض خطيفة، إنخطفت وحدة، بحاسبوها إلهها بيقتلها، الرجل ما حدا بيطلاله، أو وحدة عملت خطيئة يا عمي، ما في حدا يخطي؟ الناس منها معصومة، بحاسبوا المرأة، ما بحاسبوا الرجل، وكأنها حسنة المرأة بتتخبي، ما حدا بيكثر فيها، بس إذا الرجل عمل شغلة منيحة "هووو، يا عظمتها، وإذا عملت طيعني خطيئة صغيرة، بكبروها "فلانة خطيت"، وفلانة فلانة، كل العالم بتقوم عليها، يخطي الرجل مية مرة بالنهار، ما حدا بيحكي بهيدا الموضوع

م.ن.: إنو المرأة هي لازم تعمل إشي منيحة يعني، ما--؟

ح.أ.ع.: [01:17:59] لازم ه عطول، هي تضل المحافظة، هي المربية، هي المضحية، هي البدها تعمل--، وإذا عملت شي منيح بقولوا "إيه، من ورا زوجها"، مش هي يعني

م.ن.: كمان إنو عايشين بمجتمع كثير ذكوري نحن يعني

ح.أ.ع.: [01:18:17] نحن مجتمعنا ذكوري بامتياز، أنا كنت فكر--، ما الحياة بتعلم، كنت فكر إنو الحق، الحق، اللي يكون معه الحق هو بينجح، تاري المرأة لأ، إذا ب--، أنا وصلت لمحلات، جوزي تجوز علي، وبدون حق، وبدون ما أعرف، وبدون حتى ما أخذ رأيي، وبدون ممم، والحق كله بايدي، في أهلي قالولي مثلا إذا ما فيكي تكلمي، بتجي لعنا بتعيشي معززة مكرمة، يعني هيدا كلام مقبول لحد ما، بس الطرف الثاني ما عطوني ولا أي حق، هيدا إضطهاد، يعني، رغم إنهن بيعرفوا إنو الحق معي، وإنو أنا مني غلطانة بشي، وما إلو حق زوجي يتزوج علي، بس ما عطوني حق، ما وقفوا لجانبي "إيه، إنت لازم تتحملي، والزلمة بحقله يتجوز 4 نسوان"، حتى بمحلات معينة، الشرع الإسلامي ما عطاني حق، وصلت للمحكمة أني وجوزي، آخر شي بس كنت عند أهلي قائلتك بدي أترك وخلص، وصلت عالمحكمة أني وجوزي، إنو خلص، قررت إنو إنفصل، والنهائية، رحنا عالمحكمة، قائلته للقاضي بدي إرفع دعوة طلاق وهيكي، بيحي شيخ فلسطيني هو، بيعمل محاضرات، صحبة نحن وياه، قام بقلي "مبين هون يا حمرة؟"، حكيتله هيكي هيكي، قام قلي يا حمرة--، إجا القاضي قلي [؟؟؟ غير واضح؟؟؟] قائلته أني جوزي إلو 10 سنين متجوز، منو عطيني نفقة، مثل حسب نفقة 5 سن--، 10 سنين، بيطلعلي عنده شي 80 مليون، قلو علي "أنا ما ببعطيها، ما معي مصاري، أني ما معي مصاري، بدها تحببني تحببني"، هلق أنا يمكن بالقانون فيني إحبسه، بس المجتمع ما بيرحمك، حتى أني ما--، يعني إنو بتحببني بي ولادك؟، منها زابطة، هي من الناحية الإجتماعية، ممم، بقلي الشيخ، اللي هو صديقنا، بيعطي محاضرات، بيقل "حمرة، إذا بدك تفوتي محاكم إنت وياه، بتروح 6-7 سنين، 8 سنين، وآخر شي ما بتحصلي عشي"، قائلته للشيخ يعني إنتوا يمكن لأنو المشايخ كلكن رجال، كلكن ما بتعطوا--، عاملين قانون كلو ضد المرأة، يعني المرأة آخر شي ما بتحصل عشي، قد ما عملت، وقد ما كان القانون معها، وق--، بيحكوا ع سوالف القانون، المرأة

مدعوسة، عند كل العالم مدعوسة، وقت اللي بتوصل للحقيقة، ليش عم قلك وقت البتوصل للجد الشغلة فيها فصل، المرأة مدعوس حقها، أي تببلي حتى بالشريعة، قالولي آخر شي هيك "ما حتوصلي لنتيجة"، غير إنت عم تضبيعي وقت عالفاضي، أو بدك تسامحيه بكل شي، وتحصلي، إذا قدرتي تحصلي، قبل يطلقك، شوفي كمان، بدي عيف كل شي لحتى يقبل يطلقتي، أو بدك تساكحي وترجعي لزوجك وولادك، و...

م.ن.: بدك تعيفي كل شي يعني بدك تتخلي عن كل شي قصدك؟

ح.أ.ع.: [01:21:41] إيه، يعني، حقي، هالنفقة اللي أني دافعتها عن أولاده، مش عليي، أنا كنت إشنغل وربيتهن، علمتهن، مدارس، بتعرفي، عيلة برقبتي، أنا كنت عم بعملهن كل شي، حق النفقة قلي، قلو للقاضي "أنني ما معي أعطيتها مصاري"، إيه شو بدو يعمل مع القاضي؟ قالولي "فيكي ت--"، قلهن "بدها تحبسني بالمصريات تحبسني، ما عندي مشكلة"، شو بدك تعمي إنت هون؟، وقتي.

م.ن.: صعبة كثير، إيه.

ح.أ.ع.: [01:22:12] وقتي، معش فيكي تعمي شي، بيرجع، جيت عالبيت، صاروا يتدخلوا العالم بالصلح، بترجعي بتقولي إنو في، هلق يمكن ماديا بعيشهن، ما ح عيشهن كثير، يعني حسب وضعي، بعيشهن، ما حيموتوا من الجوع، ما ح خليهن بلا مدارس، بس كيف بدي إحرمهن بيهن، كيف بدي صير الأولاد بميل، وبيهن بميل، وهول--، يعني أنا لقبيتها كثير صعبة، فقررت إنو أنا حط من حقي، إترك حقي، وإرجع ضم هيدي العيلة، لنعيش بأدنى حد من التفاهم، وأنسى، لبلش صفحة جديدة، عسى ولعل--، تركت كرامتي، أني كنت متمسكة بكرامتي، قلهن قبل ما هي الموضوع، قلهن أنا خسرت كل شي بس ما خسرت نفسي، بدي ممم، بدي ضل جاهد إنني ما إخسر نفسي، رجعت خسرت نفسي، وضحييت بكل شي، معش عندي شي، صرت إنسانة مجردة أي هلق، ضحييت، مع إنو أنا الحق معي، وأنا--، بقولوك الناس "كل الحق معك، وإنت ضحييتي، وإنت أم، وإنت علمتي، وإنت، وإنت" بس للمظبوط ما بيطلعلي شي، هو كلهن راحوا من حياتي، لو أنا بدي أعمل مثل جوزي لنفترض، بدي إتركه لجوزي وروح إطلع مع واحد، مين بدو يرحمني من المجتمع؟ كل المجتمع بدو يبنذني مثلا. أني بالنسبة إلي مثل التنتين--، كيف هيدا مثل هيجا، أني بنظري، أنا ما بعطي حق لواحد ضد الثاني، مثل ما الأب، كيف بيترك عيلته؟، مش عم تحاسبوه، وقت البدها المرأة تترك عيلتها كيف بتحاسبوه؟، ما هيدا مش إنسان مثلي مثله؟ يعني جردوني حتى من المشاعر، معش عندي مشاعر وأحاسيس، صرت بطلت أعرف حالي إذا امرأة ولا زلمي أني [تضحك]، بطلت خ--، حسب وضع شغلي وهيك، ما أعرف حالي أي شو أني، معش عندي، معش حاسة بأنوتتي، معش حاسة حالي ك، إنو أنا امرأة، لأنو أخذني الشغل وأخذني المسؤولية، وأخذني هم أولادي، وتعليمهن، ومدارسهن، وكيف بدي إحميهن من المجتمع، وكيف بدي حافظ عليهن، نسيت نفسي. نسيت نفسي، وهيدا كلو بيرجع لأنو هيك المجتمع، بتكسبي، بتكسبي إنو إنت ضحييتي قدام العالم، بتضلي محترمة قدام الناس، بس بتكوني خسرتي نفسك، وإذا بدك تربحي نفسك، بدو المجتمع كله يذمك، أنا فيني إربح نفسي، بروح عيش عند أهلي أحلى حياة، بس بدي ضل "تركت ولادها"، هي أبسط كلمة "تركت ولادها، شو"

م.ن.: في كثير ضغط بالمجتمع عالمرأة، كثير أكثر من الرجال

ح.أ.ع.: [01:25:47] إيه، كثير أكثر من الرجال، الرجال بروح، بيترك ولاده، بيتجوز، بسافر، ويبعمل اللي بدو ياه، وبيتمعشق

م.ن.: وما بيحكموا عليه متل--

ح.أ.ع.: [01:25:54] ما بيحكموا عليه، ببسّموها رجولة إذا زلمة حب ع مرته أو صاحب، هي رجولة، المرأة بيعتبروها خطيئة، أي منش مع المرأة--، الزواج شي مقدس بالنسبة لألي، عال، إنت بعدك بنت، إنت حرة تتصرفي، تحبي هيدا الشخص، تختاري هيدا الشخص، بس في زواج؟ الزواج مقدس، في إلو خطوط حمر، إنت إرتبطني بهيدا الرجل، سواء شو ما كان، شو ما طلع، هيدا الرجل، هيجا هو حياتك، هيدا هو حياتك الحاضرة ومستقبلك، ما بتطلعي منو، ما بتخطي الحدود اللي يحللها رب العلمين، بتحترمي هيدا الزواج، هيدا البيت اللي رح تعيش فيه، هيدا البيت اللي بنيتيه مع هيدا الرجل، هيدا البيت بدك تحافظي عليه، بالمبدأ، أي مني ضد إنو المرأة تروح [؟؟؟ غير واضح؟؟؟]، بس كمان مني مع الرجل يروح يعمل هيك، مثل ما يكون لازم هو عندك كمان إنت هيدا الزواج مقدس، هالمرأة اللي إرتبنت فيك وربطت حياتها بحياتك، المفروض إلهي إحترام لأقصى الحدود، إلا إذا هي ما تفاهمت معك لنقطة الصفر، ما في حدا بيخلقوا عقليين مثل بعضهن، كل العقول مفترقة، بس إنو نحاول

نجتمع تحت سقف هيدا البيت، ونربي أسرة، وفي ولاد، نحافظ قد ما فينا ع هيدا البيت، وع هالأولاد وهالأسرة، يطلعوا صالحين، بس المجتمع مش هيك، بحلل للرجل وبحرم للمرأة

م.ن.: مذبوط، وبسامح الرجل

ح.أ.ع.: [01:27:30] بينسى خطايا الرجل، خطيئة المرأة ما بتنسى، وإضافة إنو كمان بضل ما عندها حرية مثلا تروح عذوقها وتجي، عندها شغل، عندها--، مش كل النسوان فيهن يروحوا عالمدينة يتسوقوا، فيهن يروحوا، بدهن، إجي عبالهن شغلة، يروحوا يجيبوها، هي كمان بعدها بمجتمعنا شوي يعني منها ع حريتها عايشة، مش مثل ما بدها بتتصرف، هي كمان بالعكس مع الرجل، بحقلها تروح عشي رسمي، عرس، بينعزما، عاجر بتروح، [؟؟؟ غير واضح؟؟؟]، بس إنو، ممم، شوي إنو ما عندها الإنفتاح التام، ما عندهن

م.ن.: حمرة قبل ما بل--، قبل ما أنا بلشت التسجيل قنطلي إنو كنتي حابة ترجعي عملي علم إجتماع بالجامعة، ولا؟

ح.أ.ع.: [01:28:35] لأ، في إستاذ نصحني [؟؟؟ غير واضح؟؟؟]، قلي "يا حمرة لازم عملي علم إجتماع، إنت لأنو عندك مواضيع كثير فيكي تحكي فيها"، قمت سجلت وما قدرت، هلق قلت بعدين، ما قدرت وفق بين الفرعين، يعني إدريس بفرعين، وتزوجت، ما قدرت وفق بين الفرعين، صار عندي بيت ومسؤولية، رجعت قلت بكرا بس يكبروا أولادي يرجع بسجل علم إجتماع، وصاروا ولادي بيكبروا، بتكبر مسؤوليتهن.

م.ن.: هيك كان بدي إسالك، إذا رجعتي مثلا طلع عبالك تفوتي عملي شي بالجامعة؟

ح.أ.ع.: [01:29:13] يا ريت، شفتي أني، لو هلق عندي وقت وعندي مادة، ما بخلي فرع إلا ما بدرسه، كل ما بخلص بفرع، بدر--، أدب عربي، علم إجتماع، psychology [تضحك]، كل ما بخلص فرع بسجل فرع، أني هيك بحب، لأن من الأساس شاطرة بالكل أنا، بدرس كل شي، ما بهمل شي، ما حب--، ما حبيت شي عالأخر، وما كر هت شي عالأخر، عملت أدبي مع إنو كنت شاطرة كثير بالmath، وبالbiology، وهيك، بس رفيقتي قانطلي -مش شاطرة بالmath- قانطلي "كيف بدك تتركيني لحالي تسجلي علمي؟"، تسجلت معها، مع إنو كان مستقبل العلمي أحسن علي.

م.ن.: حمرة إنت عملتي كتاب مع إستاذ بالAUB عن السوالف ببسموهن؟

ح.أ.ع.: [01:29:58] سوالف البادية

م.ن.: فيكي تخبريني كيف، كيف بلشت هالتجربة، كيف يعني بلشتوا فيها؟

ح.أ.ع.: [01:30:05] التجربة، الدكتور رامي زريق، هو عميد هون بالجامعة، مناوب، طلع عباله يعمل دراسة عن البدو، هو مخبر بالكتاب كيف تعرف ع بدوية بالجنوب، وفهم إنو في بدو، ما كان عرفان إنو في بدو، إجي لهون، في عمي ببشتغل بالجامعة، عرف إنو في بدو هون، طلع عباله يعمل دراسة عن البدو، قلهن بدي وحدة تكون، تساعدي بهيدا المشروع، حدا مش ضروري مرأة أو شي، حدا من البدو، في يساعدي، بدي أعمل دراسة عن البدو، في حدا من بندايل موظف عنده بالجامعة، مرته كانت تعلمني، إجي هيدا، هو مدير بالجامعة، عم بقلها لمرته هيك هيك العميد عنا عم بقول، قانطله "في بدوية إسمها خمرا، كنت أني علمها، كثير شاطرة، وأنني بعرف محل ما قاعدة، بحوش العرب عالطريق العام"، إجي عم يسأل عمي، قله "مهني كنتي"، قله إيه، خليها--، قلي "تروحي بالجامعة"، عمي، قال "بدو المدير يشوفك"، قانطله "شو بدو فيني المدير؟" [تضحك] [؟؟؟ غير واضح؟؟؟]، قانطله إيه بروح، المهم، رحت، ما بعرف إذا فيني إحكي تفاصيل، أنا فكرت هالمدير بدو يكون لابس طقم رسمي وقاعد ورا المكتب، وهيك، هلق فتننا، قلتلهن وبين المدير، فوتونا عالمكتب، زوجي كان معي، وبين المدير؟، لقيت الدكتور رامي جاي لابس تيشيرت [T-shirt]، وهيك، قام بقولولي المدير، قال أهلا وسهلا، سلمت عليه، طلع إنو هو كثير حباب، كثير إجتماعي، ومتواضع، وقلي أنا بدي أعمل مشروع هيك هيك، فيكي إنت تدخلني معي المشروع؟، فتننا بالمشروع عأساس بدنا نألف كتاب نحكي فيه عن البدو بشكل عام، عن عاداتهن، عن تقاليدهن، عن حسناتهن، عن سيئاتهن، عن التغذية عندهن، عن الأعشاب، كيف بينداووا بالأعشاب، كيف بينداووا بالكي، قبل بيكروا [من كوي]، فمرة كنا مجتمعين، هيك، بلشنا، وبلش حط هو عناوين لكتاب، وترجمه هيك عالعربي، وإجي عم بقلي بنود الكتاب، وهيك، بالصدفة عم بحكيه عن سالفه بدوية، مع أمير إسمه عبدالله الفاضل، هيدا كان شيخ اللي عال[؟؟؟ غير واضح؟؟؟]، سالفه، كيف مرض، وكيف تركوه، وكيف راحوا، وكيف إعتز فيه، ما بعرف إذا قارية كتابي إنت، هلق بعطيكي كتابي، قام بقلي "يا حمرة--"، مهني أذكيا العمدة، ما بدي إمدح فيه،

شهادتي مجروحة، إني قول عنه ذكي، إيه ذكي، هو ذكي الزلمة، رجل علم، أنا بحترم رجال العلم، قلبي "ولك هالقصة كثير حلوة، إنت فيكي تجميلي شي 20 قصة منهن؟"، قتلته أنا إيه ممكن إجمعلك، بس ليه؟، قلبي "مهيك، من القصص، أحلى ما نكتب معلومات ناشفة، إني والله البدوي كريم، منكتب قصة بتحكي عن الكرم، بتوضح للقارئ أحلى حياة البدو، بيتعرف عحية البدو أحلى من خلال القصة، بنكون أحلى بكثير"، غيرنا موضوع ال--، عملنا أول شي دراسة عن التغذية، وإستمارات، وهيك، أول ما بلشنا بالمشروع، وقت اللي جينا بدنا نبلش بالكتاب، تغير موضوعنا، طلع معنا إني هالقصص، وإتفقنا شو بدنا نسمي الكتاب، وصار إختلاطه معنا يفهن بعض الكلمات البدو، وهي شو تفسيرها وهي شو تفسيرها، وكنت إكتبله، أول شي طلب مني إني أعمله مقدمة عن البدو، هيك شي 15 سطر، إحكي فيهن عن البدو، عملته، عجبه أسلوبه بالكتابة، وقلبي "برافو عليك، بتكتبي منيح"، بلشنا، عملنا كتاب "سوالف البادية"، وكل قصة بتعرفك عن حياة البدو، في قصة عن الشرع، في قصة عن ال[[غير واضح؟؟؟]]، في قصة عن الكرم، في قصة عن التضحية، صابرة هي مطبوطة، مش تأليف خيالي، قصص صابرة واقعية، وبتتداولها، تتداول مع مر العصور والأجيال، فمنا قلنا إني هيدا الجيل بطل يعرفهن، هو القصص، نسي، هو القصص بترجعه إني يتذكر شي من حضارته، من ثقافته، القديمة. ونجح، عملنا كتاب كثير حلو.

### م.ن.: كيف جمعتيهن للقصص من العالم حوالكي؟

ح.أ.ع.: [01:34:51] ليكي، أكثر يتهن هو أنا جدي كان يحكي، من جدي ومن ستي، قصص، في هالختيارية بيعرفوهن، لأنهن متداولين، بس بتعرفي القصص ما بتضل مثل ما هي، شي بعض، من واحد لواحد، يمكن لمن إنت تحكي قصة، بتنسى شوي منها، كل ما حدا سمعها بينسى شي منها أو بحور شي ثاني، فقدرنا، يمكن جمعت 22 قصة، دوناهن ووثقناهن وطبعناهن بكتاب، وكانت هي كثير حلوة هالشغلة بحياتي، كثير بحبا.

### م.ن.: إنت كان في إشي أصلا بتعرفيها من جدك وستك من إنت وصغيرة؟

ح.أ.ع.: [01:35:36] إيه \_\_\_\_\_ إيه \_\_\_\_\_ إيه وفي كم وحدة معش ذاكرتهن أي هن، يعني، جمعتهن من ختيارية عنا

### م.ن.: في شي هيك أقوال من فولكلور تبعك أو السوالف أو الأغاني فيكي تخبرينا يها؟

ح.أ.ع.: [01:35:57] الأغاني كانوا يحفظوها حفظ، يرتجلوها إرتجال، وفي--، يحفظوها من بعضهن، مثلا وحدة إرتجلت هي ال--، التانيين يحفظوها ويرجعوا يرددوها بمناسبات ثانية، مثلا، لفاك، مثلا أي مني حافظتهن شي، مثلا وحدة كانت تحب واحد كثير، وهي كانت كثير جميلة، جدا، منتهى الجمال، وبتحب شخص، بتحبه، كثير حلو، هلق، في عرس، إجت، كل الصبايا والشباب بيحوا عالعرس، كيف كانوا، قتلتهن أي، أسألهن كيف كانوا، شو يعملوا بالعرس، كيف يزينوا حالهن، هلق وقت يروحوا، بحطوا مايك أب [make-up]، بروحوا لعند الكوافير [coiffure] بظبطوا حالهن، أكثر شي قالولي، أمي كانت تقلي، بجيبوا جوزة، بدقوا الجوزة بدقوها منيح، بحطوها بمنديل كثير شفاف، بيعصروها، بيطلع منها زيت، بيتحموا، بيتحموا منيح، يعني بيهتموا بالحمام، مش دغري حمام عالسرير

### م.ن.: بزيت الجوز؟

ح.أ.ع.: [01:37:07] لأ، حمام عادي [تضحكان] بزيت الجوز؟، بيهتموا كثير بالحمام، بطولوا، وبجيبوا هالجوزة، بدقوها، بحطوها بمنديل كثير شفاف، أبيض يكون، بيعصروه هيك، بيطلع منها زيت جوز، بيفركوا وجهن فيه، بيفركوا كل وجهن، كله كله كله، لفترة، يعني 5 دقائق، شي، وبروحوا يناموا، قال بقولوا "بخمروا" حالهن، بخمروا حالهن، هلق النوم، بس الواحد يقوم من النوم، يقوم بشرته مرتاحة، غير البكون عم يشتغل، أو يكون عم يكتب أو عم يدرس، بتتعب بشرته، هني كل شي كانوا يعملوه--، إيه، قال و، مم، بناموا شي ساعتين تلاتة، هيدا بتكون السهرة بالليل، أو ثاني يوم العرس، بناموا شي ساعتين تلاتة، هيك راحة، اللي عندها شغل واللي ما عندها شغل بتنام، يقوموا خدودهن موردة، بشرتهن مرتاحة، هيك بظبطوا حالهن أكثر شي، هلق في إشي كثيرة بظبطوا حالهن فيها، كانوا مثلا للشفاف، في عشبة بقولوها قرّيص، هيك بتحرر شوي، بيستعملوها بالطبخ كمان، هيدا القرّيص، بجيبوه، بحفوا شفافين فيه، بينفخوا شفافين وبصيروا حمر، عيمكن عالحر اللي فيه، بورموا، وبصيروا لونهن [عالحاف؟؟؟]، بصيروا لونهن أحمر، بنقلي أمك عنك "محمرين"، أو بيدهنوا وجهن بلبن، أو بأشوة الحليب، بيدهنوا وجهن بأشوة الحليب، بخلوها قد ما فيهن، ساعتين تلاتة، وبيرجعوا بغسلوا، أو بيدهنوا بحليب وجهن، هيك بيعملوا.

م.ن.: إمك كانت تعمل هالاشيا؟

ح.أ.ع.: [01:39:04] إيه، أني عالآخر شفتها، مش من زمان، قبل ما إتزوج، كانت بس تفوّري الحليب، تبرّد أشوة الحليب، وتدهن وجهها، أو إيام بلين، وقت اللي ما يكون في أشوة الحليب، بتكفي شغل، وبتروح تغسل، بضل عوجها، قال هيدا بغذي، بغذي، هني هيك، آخدينها، هلق في إشيا كثير آخدينها من الطبيعة، كثير إشيا، ما فيي هلق إحكيك قديش في إشيا آخدينها من الطبيعة وهي مطبوطة، ف، لنرجع لهي السالفة، بقولولها، هني عنا كان قبل بقولوا إذا قامت البنات الحلوة يمسكوا عالديكة، بزيناو العرس، أو الشباب، إنو والله، قلولها "قومي والله هالديشة" إنو إنت والله حلوة كثير، "هالديشة مي حلوة بلاش"، يعني ما بتزني الديكة إلا لإنت تمسكي عالديكة، بتزيني الديكة، بتصير العالم كلها عم تتطلع عليها، بتصير العالم عينها عالديكة، والشب نفس الشبي بقولوه، مثلا كانوا إخواني التوم الكبار قد ما كانوا حلوين وأجسامهن حلوة، بيلقظوا عليهن وبقولولهن، بتقول العالم "بس ما يكونوا غازي وسامي، الديكة مش حلوة، هني بزيناو الديكة"، هيك متعارفة، هلق هي حبيبتها ما، بعد ما إجي عالعرس، ما كانت تقوم، وفي كثار بالعرس شباب، كلها حابتها وبدها ياه، وطالبيها إنو يتجوزوها، هي تفلها "قومي إديشي" هي تفلها "قومي ليش ما تدبشين؟"، هي اللي بتحبه بعده ما، جى عالعرس، ما كانت تقوم تدبك، وقت الإجي، هيدا اللي بتحبه عالعرس، قامت، مسكت عالديبة، وهي بتعني، شو طلعت، إرتجلت غنية "تقتل، ويالي-- تقتل ويا النذول، ما طول شويغي غايب" يعني "يالي نزول" يعني واحد منو بعينك معتبرته إنو ولا شي، قال عم بتمشوا قدامها، "تقتل"، صاروا يتقتلوا قدامها، هي ما التكتشت فيهن، "تقتل ويا النذول، ما طول شويغي غايب"، يعني، حبيبتها بعد ما إجي، "قوم وقل ويا هالك، لف حصان الطلاب"، يعني هلق إجي حبيبي، قوموا إنتوا فلوا، فالتوا، ضليتوا، قوموا فلوا، وإجي، يعني أني، وصارت تكمل، يعني هي قصة منهن. في وحدة كمان، حبت واحد، هي أكبر منه، وما كانوا أهلها، إختها، بحلال بحرام، يعطوا ياه، هالاشيا بعرفها أني، مش عدوري، كنت صغيرة، بس بعدين سولفولي ياه، شو غننله [تتذكر] "الظل توزل نحزن"، وقت اللي خطبت لواحد، عطوها أح--، "الظل توزل نحزن، ضليت توزل نحزن، لمن صقت بدشاية"، كلام صعب تفسيره، بس هو كثير حلو: شدي القشاط، لأنو صارت تضعف، إنو عطوها لواحد ما بتحبه، أكيد بدها تضعف، يعني، قد ما ضعفت، كل مرة بتشد بالقشاط شوي، لأنو عم تضعف، لمن صارت تحس إنو القشاط كلويها عم يدقر، لأن معش عندها لحم هون، صار يدقر بكلويها القشاط "ضليت توزل نحزن لمن سقت بدشاية" يعني حسيته عم بدق بكلاوي، "يا شوق لا تتزوج، تعطيك من ظني" هي غنية، "يا شوق لا تتزوج، تعطيك من ظنايا"، عم تفلها لحبيبتها ما تتجوز، بكرأ بعطيك بنتي، مثلا، قد ما بتحبه. إيه هي غنية كمان إرتجلتها "ضليت توزل نحزن لمن سقت بدشاية، يا شوق لا تتزوج، تعطيك من ظنايا"، شوفي القافية

م.ن.: بتحزن، في كثير سوائف هيك عن الحب يعني؟

ح.أ.ع.: [01:43:19] ما كانوا يخلوا بالحب، ما بيخلوا، بتقول المرأة، أني إذا ما أخذت فلان، ما بتجوز، كثار ما تجوزوا، في منهن، مش كثار، في منهن، لأنو ما عطوهن البيتحة، ما تزوجوا، اللي بتقدر إنو هي ما فيها تتجوز، ما بتتجوز، إيه، وما بتخلج، أني بحب فلان، بحبه، العالم كلها تعرف، مثلا إمي كانت تقول "إيه والله"، ال"هاي" يعني عند البدو، شي فيه من الحرية، "إيه والله، هالحلو والزين، كل العالم بدها تحبه"، مثلا ما فيها عيبة، إنو البنات الحلوة والمزبونة كل الشباب بدها تحبها، ويحبها 100 واحد، كل الشباب بدها تحبها، يعني شو فيها؟، مش عيب، مش حرام، مش حرام. مش حرام ولا عيب، بس طبعا محافظين ضمن الإنضباط التام

م.ن.: بس شو حلو إنو بالسوائف دايمًا في أغاني، إنو بيرتجلوا أغاني

ح.أ.ع.: [01:44:18] بيرتجلوا أغاني، إيه

م.ن.: يعني مش بس قصص كمان أغاني بالقصص

ح.أ.ع.: [01:44:23] إيه، إيه، أني، في قصص كثير فيهن شعر

م.ن.: في شي شعر كمان هيك بتتذكره؟ كثير حلوين

ح.أ.ع.: [01:44:32] في شعر كاتبته من وحي المناسبة من وحي ال--

م.ن.: إنت كاتبته؟

ح.أ.ع.: [01:44:37] لأ، هني قاييلينه، صاحبين القصة قاييلينه، أنا عم بورده مثل ما قال، إنو فلان إرتجل، قصة لأنو وقع بالأسر، عمل قصيدة، هو إرتجلها، حسب ما هني قاييلينا، القصص واقعية، منها قصص خيالية لتحطي شي من عندك، وما بعرف، بدك ألقك قصيدة بدوية مثلا "يا طير يلي بالتغريد غنيت" يعني هو محزون، مفارق حبيبته، عم يتطلع عالصفور لقاء عم بغرد، يعني عم بغني، ممم، تذكر حبيبته، قال "يا طير يلي بالتغريد غنيت، هيظنتني يا طير وشغلت بالي، ذكرتني بصاحب عنه سجيبت" سجيبت يعني بعدت "ذكرتني بالزين حلو الدلال، بالله يا طير انطرت وتعلبت، وكفخت بجن حان يا طير عالي، سل-- وصل سلامي للحلو شمعة البيت، وقلو عقب فرقاها يشين حالي"، اللي بفسروها، بيّفهموها، كثير حلوة، معانيها كثير حلوة، كانوا يرتجلوها العرب، مش من زمان بطلوا يقدرُوا يرتجلُوا، مدري شو صابهن، بيّنة، الأكل يمكن، صار منو صحي، ما بعرف، إنلخموا، مخهن بطل [تضحك]

م.ن.: كيف بتسمعون بحياتك اليومية، يعني إنت كيف تعرفتي--، كيف بينظروا بالحياة اليومية السوالف؟

ح.أ.ع.: [01:46:17] بضل في ناس مهتمين يحفظوا، مثلا في هي القصيدة، خيي كان حاطتها عالتلفون، حبها، إجي عم بقلي "ليكي هالقصيدة"، نقلتها وحفظتها، عرفتي؟، بقولها، حافظة كثير غيرها، يعني، في ناس بعدها بتحب هاالإشيا، بتحفظها، بتحطها هلق صاروا عالتلفون، قصيدة حدا بحبها، بحكها عالتلفون، قاييلينا قبل زمان، أو حدا هلق جديدي قاييلها، بحطوها، واللي بحب هيدا الموضوع بيحفظه وبصير يقوله، ناس بتحفظ من ورا ناس، بيهتموا بهيدا الموضوع، كيف ما إنت--، في ناس بيهتموا بالشعر، ناس بحبوا القصص، ناس بحبوا البيولوجي [biology] مثلا، بيهتموا بكل الإكتشافات

[ينقطع التسجيل ويواصل]

م.ن.: تانت [tante] حمرة فيكي تخبيرني عن نهار بحياتك اليومية، شو بتعملي، بتوعي--؟

ح.أ.ع.: [01:47:13] هلق؟

م.ن.: إيه

ح.أ.ع.: [01:47:13] هلق حياتي اليومية أني مثل ال--، شو بسميها هي بالعربي، machine، يعني، آلة، آلة، حياتي، يعني، أكثر شي هو اليواسيني القراءة، هالفترة، حتى القراءة ما عم بصرلي مجال إقرا، يعني قبل هالفترة كنت ما نام إلا ما إقرا، الكتاب عند راسي، بأي وقت فراغ، بفتح الكتاب وبقرا، أي كتاب، كل، البديك ياه، ما عندي شي محدد، بس هلق قليل معم بصرلي، وهيدا كثير شي زاعجني، لأنني عم بنعس من التعب، والضغط النفسي والإقتصادي والمعيشي، ومن التعب عطول، عم تشتغلي من ميل وعم تفكري من ميل، مش بس عم تشتغلي، يعني عم تتعب فكر ومخك--، وجسدك، عم ب-- بنام، دغري بنعس، ما عندي وقت إقرا، وبالنهاري، كمان نفس الشهي، ضغط شغل وهموم، بقوم الصبح وبصلي، بمشي الأولاد عالمدرسة لأنو بكون عندهن مدرسة، أهم شي أعمل فنجان قهوة، دخن، نص فنجان قهوة مع سبيجارة، بقوم ببيلش بالمحل، بنضف المحل، يشتغل بييتي، وببيع، بهتم بين شغل البيت، وبين المحل السمانه، وعاملة مثل سنتر [center] إني هون، مركز، كل واحد بدو يجي يشتري عنده هم بدو يشكيلي، المرأة عندها وضع بدو تحكيلي قصتها، وهيدا حدا عاكسه وهو جاي بالسير، بدو يفتحلي الموضوع، وأكثر وقتي هيك بروح، وهيدي إبنها مزعلها، بدو تحكيلي قصتها، وهيدي عندها مشكلة ماجية، وهي ما قدرت تشتري هيدا الغرض، وهي--، هيدا كلو مع المشتري، عنا ما في حدا يجي يشتري، إلا إذا شي ولد، بس ما في مرأة أو حدا زيون بدو يجي، إلا ما بدو يطرحك شي، عنده سالفه، ومشكي هموم الضيعة أني هون [تضحك]، ويعمل قهوة، وناس بيجوا بيشربو قهوة عندي بالنهار، بيجوا يشتروا، [بقلهن] إقعدوا نشرب قهوة، بكون بدو أمن أكل لأولادي الضهر، بدو غديهن، بكون عم يشتغل هالشغلتين مع بعضهن، يعني البيت والأولاد، والمحل، 3 شغلات مع بعضهن، وببيجي عشية نفس الشهي، بكون عندي بيع عشية لأنو بالليل ما عندي إستراحة، لأنو عندي بيع عشية أكثر من النهار، لأن بالنهار بكون الناس شي بشغله، شي بالمدرسة، شي بعده نايم، شي--، من عشية كلها بترجع الناس عبيوتها من شغلها، هيدا بدو معسل، هيدا ما عاد حدا ياكل هلق، صار كلو معسل وفحم، ودخان، بتشتري ببيسي [pepsi]، سهرية، هيك، بضل عم بيع بالمحل تقريبا لل10، 10:30، حاظة التلفزيون، متابعة مسل--، بتابع، أني عندي، بتابع، بحب مسلسل من كل قنوات، عندي هيك، شوي، إنو بحب تابع مسلسل، بحسه بريك [break] لألي، إنو فوت بهيدا المسلسل، بنسي كل شي تاني، كأنو كتل فترة نقاهة عندي هيدا المسلسل، هيدا إذا حبيبته، كان موضوع إجتماعي معين، أو شغلة حابتها أني، يعني مش كل المسلسلات بحضرها أنا، ولا، ما بحضر أفلام، ما بحضر تلفزيون أصلا أني، كنت أحضر أخبار، مهتمة كثير بالسياسة والأخبار، بطلت قد منو قرف، ومعش حب شوف وجه حدا عالتلفون، بطلت إحضر شي، ولأنو عم بتقهر عالفاضي، ومش قادرة أعمل شي ولا غير شي، بتتألمي بشغلة، شوي



بتروح، بتأملني بشغلة، شوي بتروح، بتكوني إنت راحت من أعصابك ومن حياتك، حتى هلق كورونا، مباحدة، بقلهن، ما بيطلع، مش طالع بايديي أعمل شي، بلا ما أعرف مين عم بموت، ومين عم يخطر، ومين بلا أكل، ومين بلا--، حلو الواحد يهتم بالمجتمع وبينته، بس معش، وصلتي لطريق، ما عاد عنود أعصاب الواحد يحمل، أنا من الناس الكثير، وصلت لمرحلة، إذا فيلم عم يحضروه الأولاد فيه حدا قواص أو شي، ما فيني أحضره، ما فيني شوف شي عالتلفون، عاطفتي كثير، العاطفة كثير حلوة بس بتدمر صاحبها، بتدمره، قديش هي حلوة، قديش هي بتدمر، هلق صار وقتنا ما بده عاطفة، بدو قوة قلب وبدو تمسحة، وأنا مني هيك، فيبعد قد ما فيني، بيعد، فهيك، بجي عشية، طبعاً ما بصلي بأيام الصلاة، وقت اللي بصرلي شوية وقت، بقرا قرآن، وبس نام، بجي بغسل، بقعد مع الأولاد شوي، بسليهن، بحكيلهن حكاية قبل ما يناموا، ومنروح غفلايين، هيدا الوضع كل يوم [01:52:13] نفس الشئ تقريبا، إلا إذا كان في شي أجر، بروح باخد بالخاطر ربع ساعة مش أكثر، وبرجع، بزور أمي كل جمعة، مش بالتحديد، أيام بتروح شهر، 20 يوم، أيام--، حسب ما تصرلي فرصة بروح بزور إمي وبس، أو إخواني

م.ن.: شكراً كثير

ح.أ.ع.: [01:52:33] أهلا وسهلا فيكي حبيبة قلبي

م.ن.: \_\_\_\_\_ هول كانوا كل أسنلتني، merci كثير

ح.أ.ع.: [01:52:36] شرفتي والله

م.ن.: تشرفت بمعرفتك

ح.أ.ع.: [01:52:37] الله يسلمك، كلك ذوق

[إنهاء التسجيل]